

清

史

稿

文宗本紀

文宗協天翊運執中垂謨懋德振武聖孝淵恭端仁寬敏顯皇帝諱奕訖宣宗第四子也母孝全成皇后鈕祜祿氏道光十一年六月初九日生二十六年用立儲家法書名緘藏三十年正月丁未宣宗不豫宣召大臣示殊筆立爲皇太子宣宗崩己未上即位頒詔覃恩以明年爲咸豐元年尊皇貴妃爲孝慈皇貴妃追封兄貝勒奕緯奕綱奕繹爲郡王封弟奕訥恭親王奕譞醇郡王奕詒鍾郡王奕譔孚郡王定縉素百日素服二十七月二月戊辰命左都御史柏葰內務府大臣基溥營建昌西陵爲孝和皇后山陵初宣宗遺詔毋庸升配升附交廷臣議議上詔曰先帝謙讓所不敢從曲體先懷宜定限制卽以三祖五宗爲斷嗣後不復舉行湖南土匪李沅發作亂詔惠親王保朕之叔免叩拜禮示敦長親親庚辰勅沿海整頓水師認真巡緝壬辰大理寺卿倭仁應詔陳言上嘉其直諫三月癸巳朔保昌卒以柏葰爲兵部尙書花沙納爲左都御史壬寅通

政使羅惇衍應詔陳言上優詔答之癸卯副都御史文瑞疏陳四事並錄進乾隆元年故大學士孫嘉淦三習一弊疏禮部侍郎曾國藩疏陳用人三事均嘉納之辛亥濬江蘇白茅河移建海口石插於老插橋壬戌禮親王全齡薨子世鐸襲夏四月乙丑俄羅斯請於塔爾巴哈台通商允之己巳內閣學士車克慎疏陳敬天繼志用人行政凡十條優詔答之癸酉戶部疏陳整頓財政臚陳各弊得旨實力革除庚辰英吉利國船至江蘇海口遞公文卻之乙酉船至天津五月丙申起碇南旋丁酉詔曰州縣親民之官責任綦重近年登進冒濫流品猥雜多倚胥吏而賂閭閻民生何賴焉督撫大吏其加意考察荐進廉平鋤斥貪茸庶民困漸蘇以副朕望獲湖南逆首李沅發解京誅之詔鄭祖琛廣西會匪四起應時捕勦疏報勿得諱飾辛亥改山東登州鎮爲水師總兵兼轄陸路癸丑詔東南兩河勘籌民堰甲寅以固慶爲吉林將軍六月癸亥永定河溢大學士潘世恩致仕食全俸以祁寯藻爲大學士杜受田協辦大學士孫瑞珍爲戶部尙書王廣蔭爲兵部尙書季芝昌爲左都御史甲戌除甘肅民番升科畸

零地銀甲申勅督撫舉劾屬員臚列事實勿以空言是月廣東花縣人洪秀全在廣西桂平縣金田作亂秋七月辛卯勅沿海督撫籌防海口丙辰尙書文慶坐延請妖人薛執中治病免八月丁卯洪秀全竄修仁荔浦勅鄭祖琛勦之調向榮爲廣西提督勦賊甲申詔曰各省糾衆滋事重案層見疊出該地方官所司何事卽如河南捻匪結黨成羣甚至擾及鄰省橫行劫掠自應合力捕治淨絕根株若封疆大吏玩縱於前後諱飾於後以致釀成鉅患朕必將該督撫從重治罪凜之九月丙申以廣西賊勢蔓延調湖南雲南貴州兵各二千赴勦並勸諭紳民舉辦團練辛丑命林則徐爲欽差大臣勦賊廣西甲辰以廣東游匪滋事命徐廣縉勦之內午大行梓宮發引辛亥暫安宣宗成皇帝於隆恩殿冬十月壬午以彌縫釀患奪鄭祖琛職林則徐署廣西巡撫甲子永定河漫口合龍內戌詔曰大學士穆彰阿柔佞竊位傾排異己沮格戎機罔恤國是卽行褫職協辦大學士耆英無恥無能降員外郎頒示中外以養尙阿協辦大學士十一月戊戌以奕山爲伊犁將軍庚子欽差大臣林則徐道卒以周天爵署廣西

巡撫命前兩江總督李星沅爲欽差大臣赴廣西勦賊乙巳勅各省藩庫積存雜款撥充軍需暫緩開捐劉珂免以裕泰爲閩浙總督程喬采爲湖廣總督吳文鎔爲雲貴總督獲廣西匪首鍾亞春誅之十二月己巳孝德皇后册諡禮成追封后父富泰爲三等公勅奕山酌定俄羅斯通商條例以聞庚午勅江蘇四府漕糧暫行海運甲戌向榮勦賊橫州敗之己卯卹廣西陣亡副將伊克坦布等世職丙戌給祭太廟是歲免直隸浙江湖南等省六十七州縣災賦有差朝鮮琉球入貢

咸豐元年辛亥春正月戊子朔御太和殿受朝賀詔直省查明道光三十年以前正耗錢糧實欠在民者開單請旨命賽尙阿爲大學士壬寅上謁慕陵行周年大祭禮庚戌還京辛亥詔翰詹諸臣分撰講義進呈給事中蘇廷魁疏請推誠任賢慎始圖終上嘉納之二月乙丑詔免直省民欠錢糧已入奏銷者及於江蘇民欠漕糧悉予蠲免杜受田疏陳整軍威募精勇勸鄉團察地形四事發軍前大臣庚午李星沅奏勦賊金田獲勝己卯詔曰今年節過春分寒威未解

朕返躬內省未能上感天和因思去冬禮部彙題烈婦一本內閣票擬雙籤遂用不必旌表之議發下該烈婦等舍生取義足激薄俗而重綱常所有烈婦彭氏等三十七口准其一體旌表以慰貞魂命廣州副都統烏蘭泰帶所製軍械赴廣西勦賊三月丙申命大學士賽尙阿佩欽差大臣關防馳往湖南辦理防堵都統巴清德副都統達洪阿隨往庚子上御紫光閣閱射辛丑御拱辰殿步射閱大臣侍衛射己酉河南巡撫潘鐸奏拿獲捻匪姚經年二百餘名庚戌調廣東湖南四川兵赴廣西助勦壬子發內帑銀一百萬兩備廣西軍儲發四川倉穀碾運湖南夏四月戊午命賽尙阿馳赴廣西接辦軍務己未命戶部左侍郎舒興阿爲軍機大臣庚申上御乾清門聽政郵廣西中伏陣亡副將齊清阿等世職詔以李星沅等毫無成算中賊奸計切責之以鄭祖琛養癰貽患遣戍伊犁丙寅周天爵奏洪秀全等賊皆散處山險路熟伺衝突即敗不足以大創此時兵力不足專飭防守須兵有餘力乃可連營偏勦得旨務當嚴防勿令竄逸賽尙阿師行賜馭必隆刀命天津鎮總兵長瑞涼州鎮總兵長壽從征庚

午免直隸道光三十年民欠錢糧周天爵奏劾右江鎮總兵惠慶右江道慶吉勦賊不力均奪職甲戌李星沅奏勦滅上林墟會匪癸未李星沅卒烏蘭泰奏四月初三日抵武宣軍營查詢賊勢類皆烏合惟武宣東鄉會匪有衆萬餘蓄髮易服有僞王僞官名目實廣西腹心之患得旨賊情狡獪務當持重五月戊子周天爵奏武宣東鄉逸賊竄入象州詔切責之各予薄譴詔湖南提督余萬清協同堵勦庚寅卓秉恬奏請行堅壁清野之法下賽尙阿及督撫知之甲午周天爵奏勦平泗城股匪陳亞等投誠追賊入台浦丁酉烏蘭泰奏四月十七日馳至象州堵截逸賊甲辰陝甘總督琦善以勦辦番族率意妄殺奪職逮問乙巳以季芝昌爲閩浙總督以戶部尙書裕誠協辦大學士己酉詔停中外一切工程命工部右侍郎彭蘊章爲軍機大臣乙卯上詣大高殿祈雨六月丁巳賽尙阿報抵長沙詔曰象州之賊宜重兵合圍分竄南甯太平之賊應分兵追勦其尙審度地勢人材聯絡布置糧台尤關緊要並宜分置以利轉輸丙寅烏蘭泰奏五月初十日賊陷貴州兵營當日奪回其南山屯集之賊亦經迎擊南

竄陣亡官十五員兵二百餘名附單請卹首先敗退之貴州參將佟攀梅等職辛未撥江海關稅銀十五萬兩解備湖北過境兵差乙亥賽尙阿奏六月初四日馳抵桂林通籌全局上嘉其均合機宜丁丑河南南陽擒匪四出滋擾詔所司捕之辛巳西甯番匪搶掠勒薩迎阿遣將勦捕秋七月丙戌賽尙阿奏賊由象州回竄東鄉派兵堵勦庚寅御史焦友瀛疏言吏治因循宜綜覈名實得旨如果牧令得人何至奸宄潛聚釀成巨患嗣後有似此者惟督撫是問庚子賽尙阿奏進勦新城賊匪七戰皆捷賞還烏蘭泰秦定三花翎命湖廣四川督撫嚴查會匪教匪丁未勦南河歲修工程以三百萬爲率己酉賽尙阿奏查明軍將功過烏蘭泰先勝後敗由於猛追中伏賊人壅流設伏後軍死流湍者百餘向榮初到桂時連獲勝仗每勝賞兵銀人各一兩李星沅既至減爲三錢衆兵譁然誓不出戰現已分別汰除務知持重安徽巡撫蔣文慶奏壽州匪犯程六麻與合肥擒匪高四八作亂庚戌調鮑起豹爲湖南提督榮玉材爲雲南提督重綸爲貴州提督八月乙卯賽尙阿奏進勦新城賊巢奪踞猪犴峽雙髻山

得旨嘉獎乙丑山東巡撫陳慶偕奏登州水師船被賊擄副將落水得旨速往追勦並勅奕興納爾經額嚴防海口禮部尙書惠豐卒閏八月甲申朔新墟匪首洪秀全陷永安州踞之僭號太平天國陸建瀛奏請禁天主教得旨與外夷交涉當慎之於始原約所有者仍應循守舊章戊子程裔采奏陽山賊匪竄撲宜章乳源飭總兵孫應照往勦予廣西殉難巡檢馮元吉世職建祠其子澍溥附祀甲午南河豐北三堡河決庚子定考試軍機章京例壬寅賽尙阿奏新城賊翻山竄出陷永安州詔切責之下部議處己酉命河北鎮總兵董光甲卽陽鎮總兵邵鶴齡馳赴廣西勦賊庚戌常大瀆奏盜船在石浦肆劫知府羅鏞擊走之辛亥以舒興阿爲陝甘總督九月庚午賽尙阿奏巴清德向榮託病諉卸進兵遲延得旨均奪職自効丙子詔議河海並運漕米章程冬十月戊戌勒建定海陣亡總兵葛雲飛鄭國鴻專祠十一月己卯葉名琛奏勦辦英德賊匪淨盡加太子少保十二月丁酉賽尙阿奏向榮進紮龍眼塘己酉陸建瀛奏海盜布興有繳械投誠撥營安插庚戌給祭太廟是歲普免道光三十年以前民欠

錢糧又免直隸六十一州縣民欠旗租浙江五十一州縣帶徵銀米又免奉天十五廳州縣吉林四城黑龍江一城湖南七廳州縣災賦又免浙江福建鹽場欠課又免廣西被賊八十六州縣額賦朝鮮琉球入貢

二年壬子春正月壬子朔封奕劻貝子奉慶親王永璘祀乙卯以裕誠爲大學士訥爾經額協辦大學士禧恩爲戶部尙書壬戌賽尙阿奏距永安州城三里安營督戰辛未命侍郎全慶副都統隆慶冊封朝鮮國王妃二月丁亥陳慶偕病免以李德爲山東巡撫辛丑上詣西陵三月壬子大葬宣宗成皇帝於慕陵丁巳上還京恭奉宣宗成皇帝孝穆孝慎孝全三皇后神牌升祔太廟頒詔覃恩庚申鄒鳴鶴奏永安踞匪全數東竄烏蘭泰追賊不利總兵長瑞長壽董光甲邵鶴齡均死之得旨賽尙阿等下部議處勅程喬采派兵在湖南防堵卹長瑞等四總兵世職建祠廣州副都統烏蘭泰卒於軍贈都統照陣亡例賜卹丙子卹廣西死事副將阿爾精阿等世職庚辰內閣學士勝保疏言遊觀之所煥然一新小民竊議有累主德上優容之夏四月壬午常雩祀天於圓丘恭奉宣

宗成皇帝配享甲申府尹王慶雲疏陳河東鹽務永禁簽商可募鉅款下部議行丙戌上謁慕陵行釋服禮命徐廣縉爲欽差大臣接辦廣西軍務辛卯程喬采奏郴州匪徒劉代偉作亂參將積拉明捕誅之癸巳常大淳奏鹽梟拒捕戕斃副將張蕙知縣德成經提督善祿知府畢承昭派兵攻擊斬擒百餘餘匪逃散予張蕙德成世職太僕寺少卿徐繼畬疏陳釋服之後宜防三漸一土木之漸一宴安之漸一壅蔽之漸得旨置諸座右時時省覽己亥減乾隆朝所增名糧兵六萬六千餘名庚子程喬采奏洪秀全撲全州進撲永州分股竄永福義甯檄提督鮑起豹劉長清分禦之並咨照賽尙阿一同堵禦辛丑特登額免以桂良爲兵部尙書乙巳賜章鋆等二百三十九人進士及第出身有差琦善遣戍吉林丙午鄒鳴鶴以留兵守城不令追賊奪職以勞崇光爲廣西巡撫己酉命截留漕米六十萬石分運江蘇山東備賑五月辛亥布彥泰奏庫存回布四十萬匹請變通折征允之甲寅夏至祭地於方澤恭奉宣宗成皇帝配享庚申賊陷湖南道州賽尙阿留守桂林檄江忠源張國樑移兵湖南六月甲申查辦

山東賑務杜受田怡良疏言漕船入東先行起卸以資散放丙戌命養尙阿赴
湖南督辦軍務徐廣縉接辦廣西軍務丁亥策立皇后鈕祜祿氏癸巳僧格林
沁奏劾御前大臣鄭親王端華修改大考侍講學士保清試卷阻止不聽駱矜
亢復難與共事詔端華退出御前大臣保清褫職戊戌以慧成爲河東河道總
督秋七月己未廣東羅鏡凌十八股匪勦平上嘉獎之烏什辦事大臣春熙奏
回匪鐵完庫黑霍卓竄擾烏什官兵擊退詔參贊詳查以聞甲子詔軍務未竣
需材孔亟其有知兵之人所在保舉錄用詔直省修整城垣丙寅協辦大學士
杜受田卒丁卯羅纜典奏行抵長沙聞知賊由道州竄出江華永明桂陽嘉禾
誠恐衡郡有失省垣亦應預防得旨卽妥籌辦理戊辰給事中袁甲三劾定郡
王載銓尙書恒春侍郎書元迭查有迹各予譴責其題詠載銓息肩圖各員並
下部議處庚午奕山布彥奏回匪倭里罕糾約布魯特突入卡倫官兵擊卻
之壬申洪秀全攻陷郴州甲戌常大淳奏岳州宜籌防堵詔徐廣縉撥兵前往
以麟魁爲刑部尙書八月己卯朔向榮以稱病規避奪職遣戍新疆尋留軍自

効以福興爲廣西提督癸未初舉經筵甲申詔湖廣督撫湖南之洞庭湖湖北之大江均有捕魚小船及經商大船數千百隻亟宜收集免爲賊用其各船水手習於風濤堪充水勇其即留心招集已丑羅繞典駱秉章奏賊匪陷安仁攸縣進圍省城勅賽尙阿速解省圍庚寅命廷臣會籌軍儲調常大淳爲山西巡撫以羅繞典爲湖北巡撫張芾署江西巡撫甲辰命暫免四川江西商販運往湖北米稅調福建浙江兵一千名赴江西防堵九月己酉詔賽尙阿視師無功貽誤封疆褫職逮問籍其家辛亥以載銓爲步軍統領以訥爾經額爲大學士禧恩協辦大學士甲寅獲西番賊阿里克公住斬之命駱秉章暫留湖南會辦戊午上謁東陵卹湖南陣亡總兵福誠等世職己未常大淳奏賊將北竄防禦兵單命徐廣縉撥兵赴岳州助防丁卯上還京冬十月辛巳上臨贈大學士杜受田第賜奠加其父杜燂禮部尙書銜甲申黃宗漢奏請浙江新漕改由海運從之壬辰季芝昌免以吳文鎔爲閩浙總督十一月丁未朔日有食之丁巳賊陷岳州戊午起琦善署河南巡撫辛酉詔徐廣縉分兵防守武昌漢陽荊州

陸建瀛蔣文慶各就地勢扼要嚴防癸亥以賊近湖北勅琦善嚴防河南邊境詔張鼎嚴防沿江要隘甲子以文慶爲戶部尙書癸酉賊陷漢陽命陸建瀛馳赴上海防堵乙亥復向榮提督銜詔在籍侍郎曾國藩督辦團練調福珠洪阿爲江南提督十二月丁丑勅各省紳士在籍辦理團練命四品京堂勝保從軍河南癸巳賊陷武昌巡撫常大淳死之上切責督軍大臣不籌全局擁兵自衛速徐廣緒治罪以向榮爲欽差大臣督辦軍務張亮基署湖廣總督以葉名琛爲兩廣總督柏貴爲廣東巡撫癸卯向榮奏賊連陷武漢搭有浮橋必須多備砲船將橋焚毀方可進勦得旨刑部郎中盧應翔所帶砲船曾在長沙擊賊即迅赴軍前甲辰吉林黑龍江徵兵到京得旨每起間二日起行帶兵官嚴守紀律不得多索車輛騷擾驛站給祭太廟是歲免直隸四十二州縣山西一府災賦浙江四十八州縣緩徵銀米各有差朝鮮暹羅入貢

三年癸丑春正月丁未征青州副都統常青兵移防豫楚戊申張亮基奏賊目蕭朝貴實在長沙城外轟斃起獲尸身驗明梟剄己酉蔣文慶奏城薄兵單移

調東西梁山兵勇來城防禦癸丑向榮奏武昌踞賊擡砲上船意欲逃竄陸應
穀奏偵得賊匪開年有東竄安慶江甯之信勅向榮多方偵備迎擊兜勦甲寅
勅步軍統領前鋒統領整備軍實盤詰奸宄甲子賊陷九江陸建瀛退守江甯
賽尙阿論斬革其子崇綺等官職丁卯命工部左侍郎呂賢基回安徽辦防加
周天爵侍郎銜會辦防務壬申陸建瀛褫職逮問以祥厚爲欽差大臣癸酉以
山西陝西四川三省紳民捐輸軍餉加鄉試中額生員學額甲戌賊陷安慶蔣
文慶死之命周天爵署安徽巡撫予江西陣亡總兵恩長世職二月丙子朔詔
京師八旗營兵十五萬之多該管大臣勤加訓練贈卹湖北殉難學政馮培元
加侍郎諡文介布政使梁星源諡敏敏按察使瑞元諡端節及知府以下官各
予世職建專祠提督雙福總兵官王錦繡附常大淳祠丁丑釋奠先師孔子遣
少卿雷以誠侍講學士晉康往南河少詹事王履謙赴東河會辦防務癸未上
臨雍講學加衍聖公孔繁灝太子太保丁亥勅文臣三品以上養廉以四成武
臣二品以上以二成充軍餉戶部請辦商捐戶輸上不許壬辰賊陷江甯將軍

祥厚提督福珠洪阿等死之以怡良爲兩江總督命慧成馳赴江南防勦調托明阿爲江甯將軍文斌爲綏遠城將軍瑞昌爲杭州將軍鄧紹良爲江南提督丙申命琦善會防淮揚勦湖北行鹽暫用川鹽二千引勦李德查拿山東兗沂曹三府捻匪命內閣學士勝保幫辦江北防務三月乙巳賊陷鎮江揚州丙午孝和睿皇后升祔太廟辛亥上耕藉田壬子命湖北按察使江忠源幫辦江南軍務丙辰勦侍郎奕經統密雲兵赴山東會防丁巳勦各省團練格殺土匪勿論以賂秉章復爲湖南巡撫勦江甯布政使陳啟邁在徐州設立糧台庚申向榮擊賊於江甯敗之以施得高爲福建水師提督壬戌以廬州爲安徽省會周天爵勦賊安速琦善進攻連獲勝仗均嘉賚之勦直隸奉天備防海口丙寅向榮奏迭勝城賊進據鍾山上優獎之命奕經托明阿赴清江防勦命瑞昌統盛京兵赴淮徐會防恩華統吉林兵駐防直隸辛未勦廣東招募紅單船邊將帶赴江南勦賊以福濟爲漕運總督夏四月庚辰日見黑暈己丑賊陷浦口滁州甲午命琦善統制江北諸軍速治楊文定庫倫喀爾喀蒙古哲布尊丹巴喇嘛

進馬三千匹及西林盟長進馬均溫諭止之己亥賜孫如僅等二百二十二人進士及第出身有差癸卯賊陷鳳陽安徽擒匪竄擾蒙城五月戊申始製銀鈔壬子王懿德奏海澄會匪陷同安安谿廈門嚴飭之周天爵奏收復鳳陽癸丑李嘉端奏金陵賊船上竄得旨此與向榮疏報不同令確切查探駱秉章奏江西上猶縣匪首劉洪義聚衆在桂東滋擾毘連廣東湖南得旨三省會勦丙辰陸應毅奏亳州失守賊撲汴梁勅江忠源馳赴河南勦賊王懿德奏漳州鎮道被賊戕害永安沙縣先後失守丁巳命勝保統兵馳赴河南戊午釋賽尙阿徐廣縉於獄從軍自効楊殿邦但明倫均留清江浦辦防周天爵奏鳳陽逸匪竄擾而西卽日赴援得旨周天爵素稱勇敢所保賊紆青練勇可當一面獨不能與賊決一死戰耶陸應毅恩華奏竄賊由曹河搶渡犯及山東得旨調陝西兵應援仍令固守潼關門戶賊陷歸德己未賊復陷安慶詔江忠源防守九江徵蒙古兵及其所進馬五千匹集於熱河壬戌詔以賊匪北竄勸諭北地紳民練團自衛如能殺賊出力竝與論功命僧格林沁花沙納達洪阿穆蔭督辦京城

巡防癸亥以許乃普爲刑部尙書翁心存爲工部尙書甲子以河南兵民固守
省城優詔嘉勉丁卯命訥爾經額防守河北桂良赴保定辦理防守己巳開封
解嚴賊南竄中牟朱仙鎮勅托明阿等追之辛未始鑄當十大錢六月乙亥福
建紳商克復漳州優詔嘉之查明給獎戊寅河南賊犯汜水分股渡河陷溫縣
托明阿擊之復汜水己卯金陵賊船上陷南康進圍南昌辛巳溫縣紳勇敗賊
復其城復會官軍敗賊於武陟命訥爾經額爲欽差大臣督辦河南河北軍務
恩華托明阿副之黃河再決豐北甲申雲南東川回匪作亂福建台灣土匪作
亂戊子美國使人求入覲詔止之河南賊圍懷慶官軍解許州圍賊走羅山福
建官軍收復永安沙縣托明阿等敗賊於懷慶乙未鎮江官軍失利奪提督鄧
紹良職以和春署江南提督戊戌優卹揚州攻城傷亡總兵雙來世職銀兩廣
西全州土匪作亂秋七月甲辰勅廣西土匪陷興安靈川分撲桂林官軍敗之
復靈川興安丙午勅慧成回清江浦防勦丁未命勝保幫辦河南軍務丙辰勅
東南河臣收撤渡船防賊偷渡卹江西陣亡總兵馬濟美世職丁巳詔江西湖

廣新漕折價解京辛酉賊竄湖北安徽勅怡良於上海設關收稅癸亥卹提督
福珠洪阿世職甲子詔紳士辦團禦賊捐軀者一體恩卹乙丑福建官軍復尤
谿八月丙子官軍解懷慶圍賊竄山西戊寅調吳文鎔爲湖廣總督裕瑞爲四
川總督樂斌爲成都將軍庚辰賊陷垣曲癸未李德卒以張亮基爲山東巡撫
略秉章授湖南巡撫甲申江西賊陷饒州郡城吉安土匪遙應之丙戌賊陷絳
縣曲沃進圍平陽哈芬免以恒春爲山西巡撫庚寅賊陷平陽勝保兵至敗之
復平陽賊由洪洞東竄癸巳命勝保爲欽差大臣賜神雀刀恩華托明阿副之
丁酉托明阿敗賊於陳留九月癸卯朔再敗之潞城黎城賊竄直隸入臨洛關
奪訥爾經額職速問以桂良爲直隸總督丙午賊陷柏鄉江西南昌圍解賊復
竄踞安慶丁未調魁麟爲禮部尙書花沙納爲工部尙書以勝保爲漢軍都統
江蘇土匪陷清浦寶山官軍復之戊申命截留漕糧備山東災賑以軍務方急
緩修豐北河工辛亥命惠親王爲奉命大將軍賜銳捷刀科爾沁郡王僧格林
沁爲參贊大臣賜訥庫尼素刀恭親王奕訢定郡王載銓內大臣璧昌會辦巡

防乙卯賊由趙州藁城陷深州命於河間涿州通州設防辛酉李嘉端能以江忠源爲安徽巡撫甲子僧格林沁復深州內寅陸應穀能以英桂爲河南巡撫己巳周天爵卒於軍辛未賊陷獻縣交河滄州進撲天津知縣謝子澄督帶練勇迎擊死之所部敗賊三十里特贈謝子澄布政使並建祠優獎練勇警聞京師戒嚴僧格林沁駐軍於武清冬十月甲戌命曾國藩督帶練勇赴湖北勦賊丙子賊陷黃州漢黃德道徐豐玉死之連陷漢陽進圍武昌丁丑賊踞獨流鎮勝保督軍至連擊敗之戊寅命恭親王奕訢在軍機處行走解麟魁軍機大臣以瑞麟穆蔭爲軍機大臣乙卯加給事中袁甲三三品卿銜勦辦安徽捻匪壬辰武昌解嚴江忠源赴皖命署臬司唐樹義江而勦賊癸巳賊陷桐城戊戌豫征山西陝西四川三省糧賦尋止之十一月壬寅朔以王慶雲爲陝西巡撫丙午福建官軍克復廈門安徽賊陷舒城辦團大臣侍郎呂賢基死之庚戌賊陷儀徵癸丑命侍郎曾國藩督帶水師勦賊安徽丁卯勝保勦賊獨流不利陣歿副都統佟鑑贈將軍賜卹十二月甲戌揚州賊潰圍出官軍復其城琦善慧成

等均褫職從軍乙亥詔以黃州賊踪曆集飭吳文鎔出省勦賊戊子琦善復儀徵已丑賊陷廬州江忠源死之以福濟爲安徽巡撫邵燦爲漕運總督丙申以侍郎杜翰爲軍機大臣翁心存罷以趙光爲工部尙書己亥祭太廟是歲免奉天直隸山東山西浙江湖北湖南廣西雲南甘肅等省二百四十四廳州縣衛災賦又免甘肅中衛地震銀糧草束各有差朝鮮琉球暹羅越南緬甸南掌入貢

四年甲寅春正月辛丑朔蒙古各盟長親王郡王迭次報効軍需銀兩溫旨嘉獎均卻還之乙巳撥內庫銀三十萬兩解赴勝保軍營庚戌官軍克獨流鎮踞匪回竄壬子張芾罷以陳啟邁爲江西巡撫王履謙疏陳河南吏治廢弛軍需浮冒河工糜費下英桂查覆丙辰浙江海運漕米改由劉河口放洋命江蘇派員設局己未命福濟經理淮北鹽務以王懿德爲閩浙總督呂佺孫爲福建巡撫辛酉袁甲三疏請事關籌餉由軍機處徑交所司勿發內閣從之乙丑命廣東購辦夷砲運赴武昌丙寅賊踞東村嚴詔僧格林沁勝保迅速勦擒丁卯湖

北進攻黃州兵潰總督吳文鎔署按察使前布政使唐樹義死之戶部議覆四
川學政何紹基捐廉疏上違式用駢文上責祁庶藻曰當問何紹基疏時卿亦
議其迂拘何爲尤而效之大學士管部乃不能動司官稿一字乎賊竄獻縣東
城莊僧格林沁勝保合軍擊之賊竄陷阜城分股竄山東己巳江蘇六合縣紳
團力保危城詔嘉之免一年錢糧二月丁丑上御經筵己卯許乃普罷直南書
房降內閣學士以朱鳳標爲刑部尙書周祖培爲左都御史起翁心存爲吏部
左侍郎辛巳以台湧爲湖廣總督壬午曾國藩奏統帶水陸師萬七千人自衡
州起程馳赴湖北癸巳奕興罷以英隆爲盛京將軍曾國藩疏請前巡撫楊健
之孫楊江捐銀二萬兩准楊健入祀鄉賢祠得旨楊健係休致之員鄉賢鉅典
非可以捐納得之曾國藩不應遽爲陳請下部議處軍興以來饑空事棘而帝
於名器猶慎之如此予殉難安徽布政使劉裕鈔世職謚勤壯癸未前協辦大
學士湯金釗兵部尙書特登額重宴鹿鳴加宮銜賜御書匾額內戊張亮基奏
獲戕害大員之賊目王小湧摘心遙祭得旨卽傳知佟鑑謝子澄家屬告祭命

托明阿幫辦僧格林沁軍務癸巳以青巖爲湖北巡撫崇綸丁憂仍同守城戊戌張亮基奏擒賊渡河山豐縣竄入單縣官兵迎擊獲勝復陷金鄉三月庚子朔張亮基奏賊陷鉅野鄆城辛丑命載齡帶兵一千駐防河間桂良台祿帶馬步兵千五百駐防德州乘章奏賊陷岳州曾國藩回省防堵留候補道胡林翼楚南勦賊壬寅賊陷陽穀知縣文穎澄任五日死之優卹建祠甲辰賊由陽穀冠縣竄至清河之小灘又分竄至臨清之李官屯乙巳命勝保迎擊山東竄賊布政使崇恩奏帶兵扼守臨清州辛亥上耕藉田丁巳賊陷臨清越十日官軍復之潰匪南竄勝保追擊曾國藩奏勦賊岳州失利回守長沙下部議處夏四月庚辰順承郡王春山薨阜城賊竄連鎮僧格林沁追擊圍之壬午勝保奏馬隊追勦臨清潰匪全數殄滅得旨嘉獎加太子少保德勒克色楞善祿黃馬褂己丑予告大學士潘世恩卒內大臣璧昌卒辛卯鮑起豹能以塔齊布署湖南提督曾國藩奪職勦賊曾國藩克復湘潭塔齊布彭玉麟楊載福勦賊大勝靖港賊退五月己亥朔葛雲飛祠成賜御書匾額廓爾喀國王表請出兵勦賊

溫詔止之辛丑孫瑞珍免以朱鳳標爲戶部尙書趙光爲刑部尙書彭蘊章爲
工部尙書副都統綿洵追賊於豐縣敗之賜巴圖魯勇號乙巳連鎮賊首李開
方竄陷高唐州勝保督兵追之壬申上祈雨大高殿丁巳祈雨天神壇庚申荆
州將軍官文奏官軍收復監利縣宜昌府城勒塔齊布統軍赴湖北勦賊前湖
北巡撫崇綸以託病奪職壬戌兩癸亥和春福濟奏收復安徽六安州城六月
戊辰朔賜臨清冠縣被賊難民一月口糧江西賊竄湖北德安庚辰許乃釗免
以吉爾杭阿爲江蘇巡撫詔曰中國海口除通商五口外夷船向不駛入近日
乃有闌入金陵鎮江之事意欲何爲葉名琛即向各國夷酋正言阻止辛巳詔
直省團練殺賊者建立總坊入祀忠義祠婦女遇難捐軀者入祀節孝祠癸未
賊陷武昌台湧能以楊霈爲湖北巡撫著總督命曾國藩由岳州進勦英桂赴
信陽防堵副都統達洪阿卒於軍贈都統辛卯勒葉名琛勦捕廣東會匪盜船
鑄鐵錢鉛錢秋七月辛丑湖北賊陷岳州連陷常德壬子詔青慶棄城逃走遠
赴長沙飭官文傳旨正法副都統特爾清額卒於軍庚申湖南水師克復岳州

子革職侍郎曾國藩三品銜命道員胡林翼攻勦常德壬戌楊霈奏克復沔陽
賊陷安陸閏七月戊辰湖北官軍克復安陸丁丑欽差大臣琦善卒於軍以托
明阿爲欽差大臣督辦揚州軍務庚辰楊霈奏克復京山孝感天門黃陂麻城
等城向榮奏官軍收復高淳丙申和春奏克復太平八月庚子官文奏連復嘉
魚蒲圻癸卯廣東土匪陷肇慶調湖南福建兵勦之甲寅湖南官軍由城陵磯
進攻通城癸亥英美二國兵船抵天津海口命桂良蒞事九月辛未湖北湖南
官軍攻克武昌漢陽授楊霈湖廣總督曾國藩以二品銜署湖北巡撫塔齊布
賜黃馬褂李孟羣羅澤南李續賓並陞敘有差殉難布政使岳興署按察使李
卿穀均予諡建祠壬午湖北官軍克復黃州命曾國藩以兵部侍郎銜會塔齊
布督軍東下甲申裕瑞罷以黃宗漢爲四川總督何桂清爲浙江巡撫戊子安
徽官軍收復廬江乙未魏元烜卒以翁心存爲兵部尙書冬十月丙辰以花沙
納爲吏部尙書全慶爲工部尙書領國子監調文慶爲滿洲都統奕興爲漢軍
都統奕山爲內大臣丁巳曾國藩奏水陸軍攻半壁山賊斃賊萬餘戊午以扎

拉芬泰爲伊犁將軍甲子曾國藩等奏攻克田家鎮予楊載福彭玉麟升敘湖北軍收復蘄州十一月丁丑上詣大高殿祈雪庚辰楊需奏克復廣濟黃梅戊子羅繞典卒以恒春爲雲貴總督王慶雲爲山西巡撫吳振械陝西巡撫綏遠城將軍善祿卒於軍庚寅大學士軍機大臣祁寯藻致仕以賈植爲大學士翁心存爲吏部尙書周祖培爲兵部尙書許乃普爲左都御史癸巳湖北賊陷安徽英山安慶賊竄九江湖口及於吳城十二月乙未曾國藩奏攻克小池口上嘉獎之賜狐腋黃馬褂戊戌和春奏克復英山以克復英霍兩縣均資民力免三年漕糧辛丑袁甲三奏舉人臧紆吉進攻桐城力竭陣亡贈三品銜予世職乙卯封奕紀之子載中貝勒嗣隱志郡王改名載治貴州官兵擊賊敗之解興義城圍辛酉安徽官軍克復含山僧格林沁奏攻毀西連鎮賊巢癸亥給祭太廟是歲免河南山東山西福建湖南廣西等省一百二十九州縣又廣西土州縣十二災賦有差朝鮮琉球入貢

五年乙卯春正月己巳四川官軍克復貴州桐梓壬申貴州官軍勦匪雷台山

擒匪首陳良模甲戌以江浙漕米不敷京倉支放命怡良開辦米捐解京戊寅
吉爾杭阿克復上海縣城詔嘉獎之辛巳湖北賊由黃梅回竄漢口楊霈退
守德安奪賊仍留任癸未江西官軍克復武甯乙酉僧格林沁奏攻克連鎮首
逆林鳳祥就擒封僧格林沁親王移軍山東攻勦高唐踞匪欽差大臣勝保師
久無功褫職逮問丙戌浙江樂清土匪滋事勦平之敘連鎮功西凌阿瑞麟慶
祺綿洵拉木棍布扎布棍楚克林布各予優賚二月甲午朔王懿德奏夷商來
閩販茶租賃民房久居藉收茶稅從之以法將刺尼樂助攻上海資綢四端銀
一萬兩從吉爾杭阿請也己亥上御經筵僧格林沁奏克復高唐州餘匪竄入
馮官屯辛丑福建匪徒作亂勦平之戊午鄂賊北竄勦僧格林沁調撥馬步兵
三四千赴河南助防三月甲子廣東官軍復海豐皖賊陷徽州乙丑上謁西陵
賊陷武昌巡撫陶恩培死之以胡林翼署湖北巡撫辛未上還京辛卯貴州匪
首楊鳳捕誅餘匪平夏四月乙未安徽官軍收復婺源以額駙景壽爲御前大
臣丁未江西賊陷廣信戊戌僧格林沁等奏攻克馮官屯賊巢擒獲首逆李開

芳餘匪盡殲得旨欣慰僧格林沁即以親王世襲許乘肩輿德勒克色楞加貝勒銜餘各陞敘江西官軍復弋陽浙江賊陷開化己未西安將軍扎拉芬在湖北勦賊陣亡優卹之襁楊需職以官文爲湖廣總督綿洵爲荊州將軍瑞麟爲西安將軍以西凌阿爲欽差大臣赴湖北勦賊庚申江西官軍復饒州廣信及興安辛酉廣東官軍勦匪獲勝水陸股匪悉平五月丙寅卹福建陣亡知縣高鴻飛入祀京師昭忠祠並於台灣建祠丁卯向榮奏勦賊三山勝之戊辰廣東官軍復河源等縣殲賊於三水辛未上御乾清門奉命大將軍惠親王綿愉參贊大臣親王僧格林沁恭繳大將軍印參贊關防壬申詔曰興辦團練原以保衛鄉閭而河南迭有抗糧抗官之事似此相率效尤流弊甚大各督撫其尙加意整頓勿令日久釀患是時山東已有黑團之害尙未上聞其後卒以兵力平之乙亥以柏俊爲熱河都統戊寅楊需軍復隨州癸未河南軍收復光山丁亥胡林翼奏分督水陸各軍力攻武漢四戰四勝得旨迅圖克復詔曰朕聞雲南回民易滋事端屢有衆衆抗糧之事恒春舒興阿務將首要各犯懲處勿令日

久蔓延以李鈞爲東河河道總督六月乙未江西賊陷義甯丁酉提督鄧紹良克復休甯乙巳廣東官軍收復封川殲賊於虎門洋面丙辰河南蘭陽河溢己未勅安徽徽甯池廣道照台灣道專摺奏事辛酉官文奏官軍克復雲夢應城秋七月壬戌朔尊皇貴太妃爲康慈皇太后廣東賊陷湖南郴州宜章癸亥陳啟邁奪職以文俊爲江西巡撫己巳向榮奏克復蕪湖庚午皇太后崩丁丑西凌阿進勦德安賊匪不利退守隨州命都興阿自馮官屯移軍勦之辛巳恭親王奕訢罷直軍機回上書房讀書以文慶爲軍機大臣癸未廣東官軍收復肇慶府德慶州甲申山西陽城土匪滋事勦平之丁亥官文奏克復漢川八月辛卯朔胡林翼督軍攻克漢鎮進圍漢陽甲午英桂奏邱聯恩擒獲捻首易添富王黨等誅之己亥湖南提督塔齊布卒於軍贈將軍庚子上大行皇太后尊諡曰孝靜康慈皇后喀什噶爾回匪入卡倭什琿布派兵逐山之戊申廣東官軍連復連州三山連山解永安城圍九月甲子大學士卓秉恬卒乙丑以劉鈺爲漢軍都統庚午命文慶葉名琛協辦大學士癸酉發內帑十萬兩續賑直隸山

東災民壬午四川馬邊廳夷匪滋事官軍勦平之癸未擒首張落刑由歸德南
竄命提督武隆額勦之乙酉命官文爲欽差大臣督辦湖北軍務浙軍克復安
徽休甯石埭戊子調鄧紹良爲固原提督冬十月丁酉和春福濟奏克復廬州
府城得旨嘉獎賜和春黃馬褂福濟太子少保免合肥三年額賦辛丑貴州苗
匪陷都江壬寅官文奏克復德安戊申石達開回竄湖北胡林翼堵勦之壬子
永免河南攤徵河工加價銀四十萬兩十一月甲子胡林翼奏羅澤南李續賓
迎擊石達開章俊於羊樓洞敗之請購洋砲擊賊勦葉名琛探購洋砲六百尊
由湖南水運湖北應用辛未廓爾喀夷人占踞後藏濟甯德興卒調麟魁爲刑
部尙書以瑞麟爲禮部尙書戊子官文奏攻克咸甯金口并報江西賊陷義甯
檄飭羅澤南回勦得旨羅澤南正在攻勦武漢喫緊不可回勦詔令曾國藩等
遣周汝筠前赴崇通爲羅澤南後路援應和春等奏擒匪李兆受竄踞英山道
員何桂珍密謀會捕不克死之十二月辛卯上詣大高殿祈雪丙申江西賊陷
臨安瑞州勦曾國藩撥兵勦之戊戌留江蘇漕米二十萬石濟江南軍癸卯廣

西官軍收復興安貴州賊徐廷杰陷鎮寧分陷思南乙巳命文慶葉名琛爲大學士桂良彭蘊章協辦大學士柏俊爲戶部尙書奕興爲盛京將軍英隆爲熱河都統丙午以鄭親王端華爲滿洲都統奕山爲黑龍江將軍命西凌阿赴河南防勦庚戌擒匪張落刑回竄歸德癸丑命英桂督勦豫東皖三省擒匪景淳奏陳防夷情形上嘉獎之駐藏大臣赫特賀奏馳抵後藏籌禦大略得旨江孜定日馬布如各地均屬中道要害卽宜扼守噶布倫中擇其爲夷情信仰者令協同辦事以輔兵力之不及生擒夷人暫留營中令來往通信以示羈縻樂斌等所擬六條下該大臣知之丁巳禘祭太廟是歲免直隸山東湖北廣西貴州等省二府一百五十八州縣又廣西三十八土州縣災賦江蘇鹽場場課各有差朝鮮琉球入貢

六年丙辰春正月己未朔惇郡王奕諒復親王以奕山爲御前大臣貝勒載治御前行走壬戌楊以增卒以庚長爲江南河道總督壬申賊擾湖南晃州麻陽官軍擊走之斬賊首何祿乙亥詔駱秉章檄知知府劉長佑赴江西勦賊戊寅

廣東提督崑壽勦歸善賊平之辛巳都督秦定三攻克舒城二月壬辰詔湖南苗弁勦匪出力准其留營序補戊戌上御經筵辛丑順天府尹蔣琦淳疏進克己復禮二箴上嘉納之丙午英美二國求改條約下葉名琛知之丁未調吉林黑龍江察哈爾綏遠城兵赴山東河南勦賊己酉酌增直省文員減成養廉壬子命福興幫辦江南軍務丙辰廓爾哈請罷兵丁巳貴州官軍攻克銅仁三月己未瓜州賊出竄連河托明阿追勦之奕湘免以慶祺爲盛京將軍壬戌湖南官軍克復永明江華劉長佑軍入江西復萍鄉江西賊陷吉安癸亥上耕藉田甲子江南賊再陷揚州奪托明阿雷以誠職授德興阿欽差大臣少詹事翁同書副之乙丑石達開陷瑞州詔廣東堵勦丁卯釋賽尙阿訥爾經額於戌所乙亥提督鄧紹良力攻揚州克之命幫辦德興阿軍務賊竄江浦丁丑羅澤南力攻武昌陣亡贈巡撫賜卹予諡戊寅賊陷江西建昌命浙江學政萬青藜布政使晏端書督辦三衢防務庚辰穆宗生母懿嬪那拉氏曾封懿妃曾國藩攻賊樟樹失利下部議處癸未恒春奏軍務省分督撫請許單銜奏事從之內戊張

國樞軍攻克浦口夏四月戊子粵賊復陷儀徵官軍尋復之甲午貴州軍復郎岱丙申雲南楚雄漢回構衅己亥江西軍復進賢辛丑奉天金州地震癸卯安徽賊陷甯國丙午前協辦大學士致仕光祿寺卿湯金釗卒贈尙書辛亥賜翁同龢等二百一十六人進士及第出身有差丙辰德興阿奏官軍攻賊三汊河毀其巢五月辛酉以穆克德訥爲廣州將軍都興阿爲江甯將軍壬戌湖北通城官軍失利道員江忠濟死之江蘇巡撫吉爾杭阿擊賊鎮江之黃泥洲不勝死之贈總督以趙德轍署江蘇巡撫甲子江南賊撲九華山營盤陷之河南軍復光州復西凌阿都統袁甲三復三品卿丁丑賊陷溧水六月丙戌朔金陵賊撲陷大營官軍退守丹陽奪向榮福興職戊子以按察使徐宗幹幫辦安徽防務命怡良僱募火輪船入江勦賊勅河南廣東撥兵和春傅振邦赴援江南丁未葉名琛奏英美法各國公使以定約十二年請赴京重修條約詔允變通阻止來京辛亥永定河溢江西賊陷饒州秋七月辛酉廣東援軍連復江西上猶雩都解贛州城圍王懿德呈進美國國書得旨更換條約難以准行仍令回

廣東商訂丁卯命總兵張國樑幫辦向榮軍務壬申江西官軍連復南康饒州
癸酉欽差大臣向榮卒於軍內子甘肅撤拉回匪滋事官軍勦平之命和春馳
赴丹陽勦賊鄭魁士接辦安徽軍務湖北援軍克復江西新昌上高赫特賀奏
廓爾喀與唐古忒和成撤回戍兵八月戊子黃宗漢能以吳振械爲四川總督
譚廷襄爲陝西巡撫癸巳命舒興阿嚴辦回匪舉行鄉團癸卯廣西官軍復上
思州貴縣丁未貴州賊陷都勻施秉進陷古州戊申安徽官軍攻克三河己酉
江西會匪攻陷廣昌南豐新昌瀘溪九月乙卯朔日有食之戊午京師米貴開
五城飯廠並撥倉穀制錢賑固安六州縣饑民己巳雲南土匪陷浪穹庚午江
南官軍攻高淳克之癸西安徽官軍復無爲州丁丑文慶等疏進孟保繙譯大
學衍義命校刊頒行壬午西甯黑番族滋事提督索文勦平之易棠病免以樂
斌爲陝甘總督有鳳爲成都將軍東統爲福州將軍冬十月丙戌貴州賊陷台
拱黃平庚寅官文勦襄陽匪徒平之甲午命英桂秦定三會勦渦河蒙城捻匪
丁酉安徽官軍克復和州雲南大理回匪戕官踞城壬寅襄樊賊犯鄧州河南

賊由夏邑趨擾徐州甲辰浙江官軍再復休甯子前巡撫張荊三品卿丁未廣西右江鎮標兵變勞崇光討平之壬子何桂清奏浙軍進克黟縣徽州肅清邵燦奏官軍擊退捻匪徐州解圍以常清爲伊犁將軍十一月乙卯朔宣宗實錄成以彭蘊章爲大學士翁心存協辦大學士許乃普爲工部尙書朱轅爲左都御史辛酉雲南官軍克復姚州乙丑升文昌入中祀命鄭魁士移軍會英桂勦捻匪秦定三會福濟勦皖匪丙寅命勝保赴安徽軍營辛未大學士文慶卒英人在廣東以查船構衅放砲攻城紳團憤擊之殲數百人勅葉名琛相機辦理壬申命柏後爲軍機大臣乙亥江西賊陷撫州戊寅楚軍道員劉長佑連復江西袁州分宜加按察使銜予其父母三品封典予巡撫駱秉章花翎英桂奏攻破雒河集賊巢庚辰上臨大學士文慶第賜奠壬午胡林翼克復武昌癸未官文克復漢陽均得旨嘉獎貴州軍攻克都勻十二月乙酉湖北官軍攻克老河口丙戌上祈雪戊子以肅親王華豐爲內大臣己丑詔曰湖北累爲賊踞小民兵燹餘生瘡痍可念現在武漢旣復亟宜援救民瘼錢糧分別蠲緩災黎作何

撫恤其速籌議以聞湖北官軍連復武昌縣黃州府城甲午胡林翼奏陳湖北
兵政吏治得旨既能確有所見即當實力舉行丙申官文奏勦辦隨州土匪匪
首就擒續報官軍連復興國大冶蘄水蘄州廣濟辛丑皖浙官軍克復甯國賜
何桂清花翎癸卯以湖南官軍勦除湖北崇通賊匪加候選道王鑫按察使銜
甲辰官文奏官軍在九江焚毀賊船詔旨國藩激厲將士由湖出江以便合勦
戊申山東官軍勦斃捻首王方雲湖北官軍克復黃梅己酉命桂良爲大學士
柏蔭協辦大學士以譚廷襄爲直隸總督曾望顏爲陝西巡撫壬子給祭太廟
是歲免直隸江蘇山東山西河南湖南貴州等省一百六十五州縣被災被賊
額賦又免江蘇六場鹽課各有差朝鮮入貢

七年丁巳春正月庚午怡良奏傅振邦克復高淳張國樑進取句容何桂清奏
浙省援勦內防本境外保鄰封得旨嘉獎調全慶爲兵部尙書文彩爲工部尙
書肅順爲左都御史廣西太平府土匪平丙子召西凌阿崇安回京加勝保副
都統銜幫辦勦匪事宜王履謙回籍命李鈞接辦河防己卯葉名琛奏防勦英

夷獲勝得旨控制外夷非內地可比定海前事可取爲鑒其務操縱得宜勿貽後悔朕不爲遙制也下蘇直閩浙各督撫知之二月乙酉曾國藩奏克復建昌丙戌上御經筵辛卯湖北官軍收復宜昌甲午雲南賓州回匪作亂甲辰湖北賊陷遠安荊門官軍擊走之丁未安徽賊匪上犯黃梅都興阿擊敗之安徽匪陷六安壬子英桂勝保奏勦辦捻匪奪回烏龍集進規固始三月癸巳朔曾國藩丁父憂給假治喪命楊載福暫統水軍彭玉麟副之內辰湖北官軍唐訓方巴揚阿勦南彰匪徒敗之賊首劉尙義降貴州提督孝順兵潰於都勻死之己未襲樊賊陷河南內鄉官軍擊復之詔怡良密查張國樑是否與春意見不合軍中統帥全在能得人心倘駕馭無方使健將不肯出力貽誤非輕癸亥上耕藉田丁卯以耆齡爲江西巡撫庚午敘克復武漢功協領多隆阿以副都統用辛未恒春奏回匪滋擾將領乏員請調卽陽鎮總兵王國材來滇協勦從之壬申江西官軍攻景德鎮不利都司畢金科戰歿劉長佑復敗於新喻辛巳廣西橫州土匪滋事廣東官軍勦平之葉名琛奏英船退出省河得旨總宜弭此

衅端不可使生邊患夏四月甲申恒春奏迤西回匪降德勒克多爾濟奏俄國請遣使來京詔止之丁亥江西賊竄福建陷邵武光澤癸巳怡良以病免命何桂清爲兩江總督乙未貴州賊陷永從丁酉湖南援軍劉長佑攻克江西新喻五月丙辰薩迎阿卒以劉銍署西安將軍湖北官軍克復江西奉新靖安安義癸亥李孟羣奏赴援廬州克復英山福建賊陷汀州丙子德勒克多爾濟奏俄使由天津來京勅譚廷襄羈縻之閏五月甲申和春奏克復溧水乙酉曾國藩奏請終制溫旨留之仍令迅赴江西視師庚寅雲南武定州回匪滋事官軍勦平之李孟羣奏擊敗崔邱竄賊得旨嘉獎丁酉勝保攻正陽關不利道員金光筮死之贈布政使庚子俄人以兵至海蘭泡建營安廠要求通商命奕山拒之辛丑何桂清奏請知府溫紹原復官辦理六合鄉團詔吉林黑龍江兵久勞於外酌量撤回壬寅慶英奏浩罕勾結回匪占踞英吉沙爾城集兵勦之以張國樞爲湖南提督癸卯福建官軍收復光澤汀州踞匪出竄連城擊敗之六月壬子召舒興阿來京以桑春榮爲雲南巡撫癸丑福建官軍收復邵武乙卯江南

官軍克復旬容加和春太子少保賜張國樑黃馬褂辛酉王鑫援江西吉安連戰勝之賜巴圖魯勇號丁卯河南南陽土匪平癸酉福建官軍收復泰甯建甯俄夷至天津遞國書命文謙卻之永定河決乙亥雲南回匪犯省城恒春自盡事聞調吳振械爲雲貴總督以王慶雲爲四川總督恒福爲山西巡撫丙子江西官軍收復龍泉戊寅命許乃釗幫辦江南軍務張亮基子五品銜幫辦雲南勦匪事宜秋七月乙酉李孟羣奏收復霍山己丑河南官軍收復鄧州癸巳命奕山會集俄使勘定黑龍江兩岸邊界甲午貴州官軍收復錦屏湖北官軍攻勦黃梅大勝總兵王國材力戰陣歿贈提督卹建祠甲辰命都興阿幫辦官文軍務八月己酉朔日有食之壬子福建官軍收復甯化癸丑江西官軍克復瑞州丁丑法福理奏克復英吉沙爾回城解漢城圍戊寅官文胡林翼奏湖北全境肅清得旨胡林翼親督所部攻克小池口賊城即乘此聲威規復九江以振全局先是林翼密奏欲保鄂省而復金陵惟有先取九江次復安慶始握要領故明詔從之九月庚辰湖南援贛道員王鑫卒於軍贈布政使壬午勝保奏

克復正陽關又奏鳳臺生員苗沛霖藉團聚衆得旨正當示之不疑藉消反側丙戌法福理奏收復喀什噶爾回城庚寅湖北賊陷舒城河南捻匪陷南陽丙申江西官軍克復東鄉丁未湖南援黔官軍克復黎平冬十月戊申朔官文胡林翼奏李續賓等水陸齊進攻克江西湖口縣城勝保袁甲三奏總兵朱連泰史榮椿等攻勦捻匪平毀韓圩賊巢蔣濬遠修攀梅奏勦辦苗匪殺匪斬擒多名都勻賊退河南官軍敗賊於南召進勦裕州泌陽餘匪己未李孟羣勦擒匪於獨山不利兵潰乙丑湖北援軍李續賓等攻克彭澤廣西官軍收復南甯戊辰胡林翼奏漕糧積弊請改章徵收以濟軍需從之庚午河南賊入武勝關直撲商南陝西官軍擊走之甲戌以楊載福爲福建陸路提督以李續賓爲浙江布政使十一月戊寅朔英桂奏德楞泰敗賊於盧氏邱聯恩敗賊於浙川安徽賊陷和州霍山楊載福克復望江東陵銅陵乙酉駱秉章奏蔣益澧江忠浚援勦廣西連戰獲勝進圍平樂戊子胡林翼疏荐布衣萬斛泉宋鼎鄒金粟等甲午廓爾喀奉表輸誠頒賞珍物丙申德興阿等奏克復瓜州得旨嘉勉賜雙眼

花翎騎都尉世職翁同書以待郎用鞠殿華加提督銜戊戌和春奏同張國樑克復鎮江賜和春雙眼花翎輕車都尉世職張國樑騎都尉世職何桂清太子太保庚子英桂奏敗賊於汝州豫西肅清辛丑永定河合龍十二月辛亥耆齡奏曾國荃攻克吉水賂乘章勞崇光會奏官軍攻克平樂廣西賊陷慶遠丙辰督辦三省勦匪副都統勝保奏請皖兵悉歸節制得旨勝保尙屬勇敢若平其躁氣斂其驕心可爲有用之材何庸自行饋請庚申英人入廣東省城劫總督葉名琛以去詔革名琛職以黃宗漢爲兩廣總督柏貴署理乙亥李孟羣奏粵捻合股東竄逼近商固命勝保嚴防之丙子裕祭太廟是歲免直隸江蘇山東山西河南陝西湖南廣西等省二百三十五廳州縣衛廣西四土縣被災被賊額賦有差朝鮮琉球入貢

八年戊午春正月己卯修攀梅罷以蔣玉龍爲貴州提督丙戌勅王懿德籌備海防庚寅江西官軍收復臨江二月庚午官軍克復秣陵關進圍金陵加和春太子太保張國樑雙眼花翎陣亡總兵虎坤元優卹世職三月丁丑朔勝保奏

勦賊獲勝固始解圍得旨嘉獎戊寅俄船至天津勅譚廷襄防堵癸未江北官軍克復江浦道員溫紹原復官庚寅福濟奏收復和州貴州賊陷都勻前提督修攀梅死之夏四月丙午朔譚廷襄奏俄人不守興安舊約請以烏蘇里河綏芬河爲界使臣仍請進京得旨分界已派大員會勘使臣非時不得入京駁之丁未江西賊竄入福建陷政和松谿戊申俄人請由陸路往來英人法人請隔數年進京一次詔不許勝保奏擒首李兆受乞降許之己酉安徽賊陷麻城另股陷蒙亳懷宿詔袁甲三勦之詔許俄人通商不許進京庚戌賊陷和州雲南大理回匪陷順甯戊申詔譚廷襄告知英人法人減稅增市俟之粵事結日彼時再議來京庚戌江西賊陷常山開化命總兵周天受加提督銜專辦浙防道員饒廷選防守衢州辛亥譚廷襄呈進美國國書詔許減稅率增口岸仍不許入京乙卯英法兵船入大沽官軍退守命僧格林沁備兵通州戊午江西官軍復甯都樂安崇化宜黃辛酉英法船抵津關命大學士桂良尙書花沙納往辦夷務江西賊竄浙江陷處州及永康壬戌湖北官軍克復九江加官文胡林翼

太子少保李續賓加巡撫銜乙丑英法兵退三汊河與俄美來文請求議事大臣須有全權便宜行事始可開議桂良等以聞詔許便宜行事丙寅命僧格林沁佩帶欽差大臣關防辦理防務戊辰勝保奏克復六安乙巳勅各省軍營挑練馬隊庚午命和春兼辦浙江軍務英船開出大沽桂良等奏英人之約於鎮江漢口通商長江行輪擇地設立領事國使駐京上久而許之五月丙子皖匪陷湖北黃安桂良花沙納奏英使堅備立約不見耆英耆英請回京詔止之戊寅捻匪陷懷遠己卯奕山奏請黑龍江左岸曠地割畀俄人甲申桂良等奏俄允代轉囑先允俄人陸行丁亥命廷臣集議和戰二者兩害取其輕戊子桂良等奏英人謂我徒事遷延卽棄和言戰大學士裕誠卒上親臨賜奠庚寅桂良等奏進英法訂約五十一款並請先訂俄美條約壬辰湖北官軍復黃安麻城福建官軍復光澤廣東官軍復廣西梧州勅耆齡檄調蕭啟江張運蘭王開化各軍由祁門進援浙江癸巳耆英擅回京賜自盡太傅杜壻卒上親臨賜奠乙未命曾國藩辦理浙江軍務丁酉桂良花沙納奏進俄美英法四國條約得旨

既已蓋用關防今復硃批依議宜示四國照此辦理至通商稅則在上海議之
庚子江北官軍克復江浦來安甲辰夷船全數退出內河命吏部侍郎匡源內
閣學士文祥在軍機大臣上行走六月己酉命桂良花沙納侍郎基溥武備院
卿明善前往江蘇會議通商稅則江西官軍復新城金谿癸丑福建匪陷建甯
福興能以周天受統其軍赴援福建召桑春榮來京以張亮基爲雲南巡撫甲
寅廣西軍復象州丁巳浙江賊陷壽昌官軍尋復之福濟以不職奪官銜解任
以翁同書爲安徽巡撫庚申論天津失事狀譚廷襄解任提督張殿元遣戍以
慶祺爲直隸總督玉明爲盛京將軍丁卯福建道員趙印川勦匪死之浙江官
軍復常山開化江西援軍復浙江武義永康衢州紹興城圍解嚴瑞麟請籌款
修築天津營壘礮臺下僧格林沁辦理辛未俄人請停辦驛站羊隻詔庫倫大
臣援舊事拒之壬申賞刑部員外郎段承實五品卿銜幫辦會議稅則曾國藩
奏由九江登陸赴浙詔嘉勉之浙江軍復縉雲秋七月甲戌朔奕山景瀛奏俄
人闖越黑河口欲入松花江於烏蘇里建屋安礮詔勘明吉黑地界據理拒絕

乙亥以李孟羣署安徽巡撫丁丑從法福理請升喀什噶爾領隊大臣爲辦事大臣周天受攻復浙江處州移軍福建癸未詔曾國藩衛嚴肅清改援福建乙酉楊載福收復安徽建德癸巳湖北巡撫胡林翼丁母憂詔在任守制給假給銀治喪丙申賊陷廬州李孟羣奪職留軍以勝保爲欽差大臣督辦安徽軍務袁甲三援剿三省捻匪丁酉福建軍復建陽光澤賊陷甯化庚子召晏端書來京以胡興仁爲浙江巡撫壬寅張芻軍復龍泉賜花翎八月癸卯朔復設天津水師甲辰福建軍復政和松谿勝保奏髮逆僞英王陳玉成竄店埠梁圍直撲定遠庚戌李定太勦賊玉山勝之解其圍辛亥蔣益澧援軍復廣西慶遠擢按察使丙辰周天受援福建克復浦城進克甯化捻匪陷豐縣辛酉捻匪竄山東陷單縣調英桂爲山西巡撫恒福爲河南巡撫乙丑官軍復豐縣捻匪陷曹縣尋復之何桂清請以海關盈餘用充軍餉允之壬申江北軍在浦口失利奪德興阿鞠殿華職和春奏浦口失利已飛調援浙之師徑赴六合探聞閩省回竄之賊將由甯太以援金陵明係城賊圍急令其部衆到處竄擾以分我兵力請

飭各路自行援剿勿致掣動全局上是之九月癸酉朔湖北官軍多隆阿克復太湖乙亥詔以天長儀徵相繼失陷六合危急溫紹原雖素得民心日久亦恐難支即調周天培一軍分援六合德安一軍前往援應辛巳官文胡林翼奏李續賓都興阿分路克復桐城潛山多隆阿進攻石牌鮑超力攻雷公埠均屬得手詔令聯絡水師進規安慶湖南官軍克復吉安予同知曾國荃等升敘有差壬午明誼奏俄案議結互換文憑開辦通商賊陷揚州奪德興阿世職命柏俊翁心存爲大學士官文周祖培協辦大學士調瑞麟爲戶部尙書肅順爲禮部尙書朱鳳標爲戶部尙書陳孚恩爲兵部尙書瑞常爲理藩院尙書綿森爲左都御史勅總兵毛三元成明幫辦德興阿軍務甲午張國樑攻克揚州續復儀徵慶端奏攻克邵武閩省肅清戊戌荊州將軍綿洵卒調都興阿爲荊州將軍和春爲江甯將軍張國樑爲江南提督己亥賊陷六合知縣溫紹原死之紹原孤守危城數年百餘戰力竭而陷上悼惜之贈布政使優卹建祠予諡冬十月癸卯朔浙江甯海土匪滋事提督阿麟保勦平之乙巳勝保奏克復天長李兆

受在事出力得旨李兆受賜名李世忠予三品銜花翎以參將補用己酉御史孟傳金奏劾舉人平齡硃墨不符派載垣端華認真查辦丁巳僧格林沁奏天津礮臺工竣上嘉之賜御服己未江南官軍復溧水壬戌命李續賓幫同勝保辦理安徽軍務戊辰詔本年鄉試主考官同考官荒謬已極覆試應議之卷竟有五十本之多正考官柏俊先革職副考官朱鳳標程庭桂暫行解任聽候查辦命莊親王奕仁在御前大臣上學習行走十一月壬申朔移吉林馬隊益袁甲三軍乙亥袁甲三請於山東東三府抽釐助餵許之己卯徐澤醅卒以朱嶠爲禮部尙書張祥河爲左都御史乙酉援閩浙軍復浦城順昌予周天培提督銜丙戌恒福奏官軍勦擒大勝豫境肅清總兵傅振邦擢提督編修袁保恒賜巴圖魯勇號丁酉內閣副本庫被盜己亥吳振械以病免以張亮基爲雲貴總督徐之銘爲雲南巡撫庚子子陣亡提督鄧紹良優卹建祠十二月丁未以宋丞相陸秀夫從祀文廟庚辰提督李朝斌收復安徽東流建德賜巴圖魯勇號永州鎮總兵樊燮以乘肩輿劾免丙辰以鄭魁士爲浙江提督督辦甯國軍務己

未李續賓進勦安徽敗績於三河集死之贈總督建祠予諡同知曾國華贈道員予諡丁卯以何桂清爲欽差大臣辦理通商事宜趙德轍免以徐有壬爲江蘇巡撫庚午以瑞麟爲大學士調肅順爲戶部尙書麟魁爲禮部尙書瑞常爲刑部尙書給祭太廟是歲免直隸安徽福建湖北貴州等省九十二廳州縣被災被賊額賦又免江蘇六場鹽課各有差朝鮮琉球入貢

九年己未春正月壬申朔桂良等奏英人藉口廣東有事罷議回粵乙亥召袁甲三來京以傅振邦督勦三省擒匪伊興阿副之壬午江西官軍復瑞金解安遠圍別賊陷南安桂良等奏和約四事勅俟英使回滬妥議庚寅福建匪周烜燬等降遂復連城乙未安徽官軍復建德丁酉勅湖北探買馬匹訓練馬隊戊戌桂良等奏英使堅欲進京勅僧格林沁嚴防海口辛丑都興阿請假以多隆阿接統其軍詔海運漕船探避夷輪二月丁未擒匪薛之元舉江浦降會李世忠攻克浦口賜名薛成良予花翎三品銜擢李世忠副將癸丑築奉天沿海礮臺鄭魁士攻克灣沚黃池賊壘甲寅上召廷臣宣示戊午科場舞弊罪狀依載

垣端華所擬主考官大學士柏蔭坐家人掉換中卷批條處斬同考官浦安坐聽從李鶴齡賄屬羅鴻繹行賄得中均處斬乙卯張芾奏官軍攻克婺源賊目張淙相等乞降丁巳翁同書奏賊陷六安慶祺卒以恒福爲直隸總督瑛榮爲河南巡撫癸亥張國樑奏攻克揚州儀徵回軍連克溧水特詔嘉獎予輕車都尉世職李若珠賜黃馬褂乙丑曾國藩奏軍抵南康蕭啟江克復南安得旨嘉獎予蕭啟江巴圖魯勇號詔編修李鴻章交伊興阿差委三月辛未朔前布政使李孟羣兵潰於官亭死之復官予卹甲戌奕山景淳奏俄人徑至烏蘇里江綏芬河擇地建屋並請會勘詔不許丙子捻匪犯河南西華舞陰前總兵邱聯恩死之贈提督予卹丁丑桂良等奏英使兵船北上阻止不聽己卯四川襄塘頭人作亂恩慶討平之誅其夷目鄧珠甲申上祈雨庚寅以旱求言辛卯李鈞卒以黃贊湯爲東河河道總督乙未俄人在黑龍江通商許免徵稅不許闖入烏蘇里綏芬夏四月辛丑朔勝保奏克復六安伊興阿解幫辦以關保幫辦傅振邦軍務壬寅調王慶雲爲兩廣總督黃宗漢爲四川總督江西賊竄湖南郴

州桂陽劉長佑擊走之癸卯勝保奏擒匪張元龍降收復鳳陽府縣並復臨淮
關築甯河礮臺戊申浙江餘姚土匪作亂討平之甲寅俄使賽善由察哈爾陸
路入京請助槍礮致於恰克圖丙辰上再祈雨己未邵燦病免以袁甲三署漕
運總督調勞崇光爲廣東巡撫兼署總督賊陷天長前提督德安死之復官予
卹辛酉奕山奏俄船由黑龍江入松花江東駛入海得旨不許入綏芬令特普
欽派員阻之壬戌王懿德免以慶端爲閩浙總督羅遵殿爲福建巡撫癸亥兩
乙丑賜孫家鼐等一百八十人進士及第出身有差戊辰廣東官軍復嘉應竄
賊撥連平陷樂昌五月丙子詔駱秉章仍令田興恕回援貴州兆琛一軍撤回
己卯勅奕山更正俄人條約辛巳勅慶昫密查張家口白城居住俄人壬午以
周天受督辦甯國軍務甲申俄人請赴三姓貿易詔責奕山辦理轉弱革副都
統吉拉明阿職枷號烏蘇里地方庚寅官文奏探聞石達開將犯四川詔曾國
藩移軍夔州辛卯桂良花沙納奏英酋於本月十三日起碇入京桂良等卽日
馳驛回京大學士翁心存乞休允之復以賈植爲大學士調許乃普爲吏部尙

書張祥河爲工部尙書沈兆霖爲左都御史癸巳駱秉章奏石達開竄湖南劉長佑江忠義田興恕諸軍擊走之內申僧格林沁奏英船鳴礮闖入大沽我軍開礮轟擊擊沈多船並有步隊上岸搦戰我軍徑前奮擊擊斃數百名其兵頭赫姓並被礮傷我軍亦傷亡提督史榮椿副將龍汝元等夷船即時出口得旨將弁齊心協力異常奮勇先獎賞銀五千兩並查明保奏戊戌詔夷人雖經懲創仍宜設法撫馭即派恒福專辦撫局僧格林沁仍辦防務六月己亥朔賜僧格林沁御用珍服庚子擒匪陷盱眙官軍尋復之壬寅特普欽奏俄人在三姓者偏強不肯折回命景淳前往查辦癸卯廣西官軍復上林匪陷賓州甲辰張亮基奏回匪馬凌漢伏誅丙午恒福奏美人進京換約許之癸巳英法兵船全數開行庚申以李若珠爲福建陸路提督辛酉何桂清奏英法陸續回滬乙丑陳玉成陷定遠丙寅和春奏水師勦賊獲勝秋七月庚午曾國藩奏克景德鎮復浮梁戊寅勝保奏翁同書潰敗情形得旨汝爲統帥只知炫己之長不顧援人之失日日聚訟庸何濟乎己卯美使華若翰遞國書和約用寶在北塘交換

庚辰詔曰朕聞勝保專以招降爲能事降衆未盡薙髮張元瀝且四外打糧又報克復時時該縣並無城池賊因無糧退出虛報邀功此次姑不深究即約束反側力改前非凜之癸未御史趙元模奏黃河北流洄出濱河田畝三四千頃請辦屯田寓兵於農較勝團練上是之下袁甲三庚辰長議奏乙酉詔曰王大臣續陳審明科場舞弊之大員父子及遞送關節之職員分別定擬此案程炳采於伊父程庭桂入闈後接收關節令家人轉遞場內程庭桂並不舉發程炳采處斬程庭桂免死遣戍軍臺謝森墀潘祖同潘敦儆等俱免死發遣新疆己丑駱秉章奏石達開圍寶慶李續宜援之立解城圍癸巳命李若珠幫辦江南軍務八月戊戌朔崇恩罷以文煜爲山東巡撫己亥上御經筵乙巳勒恆祺留辦廣東通商勝保奏李世忠勦賊獲勝解定遠滁州圍詔擢李世忠總兵廣東官軍復連山開建庚戌命曾國藩駐軍湖口命都興阿蒞江甯將軍視事多隆阿接統所部總理前敵事務甲寅景淳奏俄人船在三姓者現令折回在烏蘇里者未肯聽命詔體察輿情妥爲辦理己未美人請先開市以英法約議未定却

之辛酉賂秉章奏石達開南陷江華永明將入廣西現飭劉長佑統軍追勦得旨田興恕一軍援黔李續宜一軍回湖北備調壬戌髮逆擒匪會攻壽州官軍擊却之御史陳慶松奏科場案內大員子弟陳景彥等贖罪太驟請仍發遣嚴旨斥之甲子廣東官軍復靈山九月戊辰安徽賊陷霍山盱眙勝保擊退之勝保丁母憂留營視軍甲戌胡興仁罷調羅遵殿爲浙江巡撫戊寅王慶雲病免以勞崇光爲兩廣總督庚辰官文胡林翼奏多隆阿攻破安徽石牌擊破援賊獲賊目霍天燕石廷玉得旨嘉獎己丑傅振邦奏追勦擒匪敗之甲午曹澍鍾奏石達開圍廣西省城蕭啟江蘇鳳文會合蔣益澧分途勦擊敗之立解城圍冬十月丁酉朔時享太廟上親詣行禮賂秉章奏賊中投出難民給予免死護照資遣回籍願効力者准其留營得旨各省均可照辦戊戌雲南官軍克復嵩明陣斬賊首孫漢鼎庚子以曾望顏署四川總督譚廷襄署陝西巡撫辛丑以袁甲三爲欽差大臣督辦安徽軍務以待郎匡源內閣學士文祥爲軍機大臣癸卯河南擒匪陷蘭儀圍考城通許擾尉氏分竄直隸山東戊申命總兵田在

田幫辦傅振邦軍務乙卯授袁甲三漕運總督丙辰勝保克復懷遠江蘇官軍
勦六合失利奪李若珠職戊午美使請開潮州臺灣通商口岸庚申河南官軍
勦平鄆陵擒匪西路肅清壬戌以明誼爲烏里雅蘇臺將軍景廉爲伊犁參贊
大臣崇實爲駐藏大臣乙丑命官文曾國藩胡林翼妥籌四路規皖十一月戊
辰滇匪犯叙州奪萬福職以皂陞爲四川提督辛未何桂清奏探聞英法明春
必來尋衅恒祺奏英兵續行至粵詔僧格林沁加意津防丁丑賊陷浦口總兵
周天培死之予世職癸未特普欽奏俄人在黑龍江左岸占踞五十餘屯請調
西丹墨爾根布特哈兵交那爾胡善訓練聯絡旗民參夫有事抵禦從之內戊
命張道督辦皖南軍務己丑曾國藩奏韋志俊以池州降滇匪陷叙州另股陷
西陽秀山庚寅四川官軍復筠連慶符高縣乙未戶部災十二月丙申朔將壽
遠奏石達開糾黨十餘萬山桂犯黔將以窺蜀詔田興恕勦之戊戌上詣大高
殿祈雪雲南邱北土匪滋事戕官官軍討平之庚子和春奏官軍攻破江浦賊
壘揚州西界肅清壬寅吏部尙書花沙納卒丙午何桂清報英法兵船到滬以

田興恕爲貴州提督辛未援黔湘軍攻復鎮遠庚申景淳奏請招集流民參夫給地設卡以助邊防從之壬戌袁甲三奏攻克臨淮關得旨嘉勉下部議叙穆騰阿加都統銜甲子貽祭太廟是歲免直隸河南山東浙江貴州等省一百五十七州縣被災被賊額賦有差朝鮮琉球入貢

十年庚申春正月丙寅上三旬萬壽頒詔覃恩詔先朝壽節有告祭之禮升殿之儀本年勿庸舉行外吏外藩並停來京祝嘏加恩親藩悼郡王奕諒管親王貝子奕劻管貝勒餘各封賞及於廷臣疆臣戊辰前甯夏將軍托雲保卒己巳解勝保欽差大臣專辦河南勦匪袁甲三專辦安徽丁丑瑛槩以遲解京餞降官以慶廉爲河南巡撫己丑刑部主事何秋濤呈進所纂北徵彙編八十卷上嘉與之賜名朔方備乘入直懋勤殿壬辰有鳳免以全亮爲成都將軍占泰爲四川提督甲午御史白恩佑言津防重大請預籌後路以保萬全得旨所奏固是然駐兵籌餉甚覺爲難現在津防周備可勿庸議特普欽奏請召集鄂倫春人入伍從之扎拉芬奏請與俄廓合攻印度上曰俄非和好也廓豈英敵二

月丁酉上御經筵庚子以劉源灝爲貴州巡撫袁甲三奏克復鳳陽賜黃馬褂辛丑何桂清奏上海英人經華商開導索兵費一百萬津約不能更易入京換約如不見許即開船北駛詔僧格林沁嚴備津防後路海運漕糧暫緩放洋丙午湖南官軍克復貴州鎮遠庚戌擒匪陷桃源上竄清江庚辰長退守淮安壬子援桂湘軍克復柳州柳城加道員劉坤一按察使銜甲寅張芾奏官軍復建德匪陷涇縣旌德連陷太平己巳以倭什琿布爲禮部尙書春佑爲熱河都統辛酉詔和春分兵援浙三月乙丑朔袁甲三奏官軍復清江庚子命提督張玉良統軍援浙丙子賊陷杭州巡撫羅遵殿死之越六日將軍瑞昌復其城重寶瑞昌張玉良等以王有齡爲浙江巡撫丁亥上耕藉田辛卯浙江官軍克復長興臨安孝豐甲午何桂清奏夷船北犯閩三月癸卯四川官軍克復蒲江賊陷石山丙午命曹澍鍾督軍四川以劉長佑爲廣西巡撫丁未賊陷溧水連陷句容以張玉良爲廣西提督留蘇督軍尋令折回杭州庚申和春等奏陳玉成率衆突犯大營城賊出而合犯官軍力不能支退守鎮江壬戌以王夢齡爲漕運總

督夏四月丙寅以明儒曹端從祀文廟癸酉賊陷丹陽張國樑死之和春走常州戊寅詔直省舉辦團練命都興阿督辦江北軍務癸未詔兩江總督何桂清屢失城池褫職逮問以曾國藩著兩江總督擢兵部郎中左宗棠四品京堂襄辦曾國藩軍務乙酉賊犯常州和春迎戰受傷卒以魁玉署江甯將軍會巴棟阿扼守鎮江辛卯賊陷建平張玉良兵潰於無錫壬辰賜鍾駿聲等一百八十三人進士及第出身有差癸巳賊陷蘇州巡撫徐有壬死之五月甲午朔以薛煥爲江蘇巡撫暫署總督己亥江蘇常熟縣知縣周沐潤招募沙勇克復江陰辛丑賊陷浙江長興圍湖州蕭翰慶赴援失利死之甲辰曾國藩奏陳三路進兵規蘇保浙並調沈葆楨差遣上嘉允之以東純兼署四川總督丙午賊陷吳江崑山及浙之嘉興玉明奏金州岫岩海口有洋船六十餘停泊劫掠牲畜庚戌勅王夢齡督同喬松年開辦江北糧臺辛亥卹殉難在籍侍郎戴熙贈尙書予世職建專祠設文節甲寅命毛昶熙辦河南團練杜翻辦山東團練戊午李若珠奏薛成良投誠復叛捕誅之己未曾國藩奏隨調鮑超朱品隆進駐祁門

鄂軍不宜再調從之。王明奏洋船到金州海面一百餘艘，文煜奏英法兵到烟台者約有萬人，探聞有山海豐大山北犯之說，均下僧格林沁知之。六月癸亥朔，勅准巴爾虎旗人一體考試甲子英船駛入北塘內，寅賊陷青浦，松江已已劉長佑奏復慶遠石達開南竄，庚午瑞昌奏復廣德，辛未萬壽節御殿受賀，壬申大學士彭蘊章罷直軍機，命邵燦劉繹晏端書龐鍾璐各在原籍舉辦團練，戊寅王有齡奏在籍道員趙景賢克復湖州，薛煥奏克復松江，庚辰英法兵登岸，遂踞北塘，裁南河河道總督暨淮海道各官，壬午僧格林沁奏英法勢大志驕，難望議和，得旨以撫事責之恒福，以顧大局，丙戌命曾國藩爲欽差大臣，實授兩江總督，己丑夷人犯新河官軍退守塘沽，命駱秉章馳赴四川督辦軍務，辛卯手詔僧格林沁曰：握手言別，倏逾半載，大沽兩岸危急，諒汝憂心如焚，惟天下大本在京師，不在海口，若有挫失，總須退保津通，萬不可寄身命於礮臺爲一身之計，握管淒愴，汝其勉遵勅，西凌阿固守天津，瑞麟伊勒東阿赴通州防堵，秋七月癸巳命巴棟阿援金壇，戊戌大沽礮臺失守，提督樂善死之，優卹。

建祠庚子僧格林沁退守通州辛丑英人陷天津浙江賊陷臨安餘杭四川賊陷邛蒲新津甲辰江蘇賊復陷松江丁未以崇實署四川總督己酉裕瑞奏浩罕請依前通商許之以常清爲伊犁將軍辛酉金壇陷知縣李淮守三年援兵不至力竭死之紳民從死者逾千人命勝保督馬隊守通州八月癸亥洋兵至通州臧垣誘擒英使巴夏禮解京戊辰瑞麟等與洋兵戰於八里橋不利命恭親王奕訢爲欽差大臣辦理撫局己巳上幸木蘭自圓明園啟鑾丁丑上駐蹕避暑山莊李世忠以擒叛將薛成良擢授江南提督戊寅詔曰江南提督張國樞謀勇兼優忠義奮發在軍十年戰功卓著東南半壁倚爲長城本年大營潰散回援擊賊受傷沒水先後奏報朕猶冀其不確迄今數月其爲効死捐軀無疑若使張國樞尙在蘇常一帶何至糜爛若此追念蓋勞益深愴惻贈太子太保入祀昭忠祠分建專祠子孫幾人送部錄用己卯命都興阿帶兵入衛從官文請也命玉明成凱樂斌文煜英桂督兵入衛辛巳命恒福駐古北口備防吳廷棟接轉文報壬午浙江官軍克復平湖嘉善廣東官軍克復樂昌仁化癸未

江蘇賊陷常熟圓明園災常熾堯內務府大臣尙書文豐死之庚寅恭親王奏請還巴夏禮於英軍薛煥奏劾馮子材赴援金壇擁兵不進致令城陷詔薄譴之九月壬辰命勝保爲欽差大臣總統援軍勅恭親王奕訢照會英人勿修城北礮臺速行議約甲午英使法使入城大學士彭蘊章尙書許乃普以病乞免許之己亥命慶廉英桂兵駐直備調辛丑賊陷甯國周天受死之甲辰命左宗棠督辦浙江軍務乙巳撫局成恭親王奕訢奏請宣示中外如約遵行許俄人駐烏蘇里綏芬停各省援兵勅英桂來京議西巡戊申李若珠奏克復江陰辛亥賊陷徽州守城道員李元度棄城走癸丑直隸山東河南賊匪並起命僧格林沁討之庚申恭親王奕訢奏洋人退至天津籲請迴鑾冬十月辛酉朔詔天氣漸寒暫緩迴鑾以田興恕爲貴州提督子陣亡提督周天受周天培世職建祠予諡附祀道員福威等壬戌以劉源灝爲雲貴總督鄧爾恒爲貴州巡撫甲子勅文謙恒祺辦理通商事宜吳廷棟督辦防務以文安爲湖南提督以馮子材督辦鎮江軍務丙寅恭親王奕訢奏換俄人和約請用御寶從之辛未俄羅

斯致槍斃癸酉勅樂斌英桂回任庚辰以嚴樹森爲河南巡撫毛昶熙督辦河南擒匪辛巳命都興阿督辦江北軍務李若珠副之以總兵田在田接辦徐宿勦匪准徐道吳棠幫同辦理十一月辛卯勝保奏以大順廣道聯英專辦河防准其奏報從之癸巳翁同書奏陳謹天戒固邦本收人才練京營爭形勢得旨收人才一條利少弊多餘留覽甲午浙江賊陷新城臨安富陽乙未王夢齡奏勦賊獲勝三河肅清并請節制黃開榜水師從之庚子曾國藩奏鮑超等克復黔縣辛丑李若珠乞養親以曾秉忠代之癸卯以杭州解嚴優資瑞昌王有齡等瑞昌奏陳慶端力保浙疆請加優獎得旨不分畛域皆爾大吏分內之事甄敘督撫出自朝旨非汝所得擅請戊申命成琦會景惇查勘俄羅斯東界癸卯浙軍張玉良攻復嚴州甲寅官文胡林翼奏陳玉成圖犯懷桐多隆阿會合李續宜迎勦大敗之殺賊萬餘多隆阿賜黃馬褂李續宜加二品銜十二月辛酉命西凌阿國瑞幫辦格林沁軍務丙寅命張亮基留辦雲南軍務己巳始置總理各國通商事務衙門命恭親王奕訢桂良文祥管理以崇厚充三口通商

大臣薛煥兼辦上海等處通商事務准旗人學習外國語言文字己巳以田興
恕爲欽差大臣督辦貴州軍務丙子左宗棠奏督軍克復江西德興安徽婺源
予三品京卿乙酉以官文周祖培爲大學士肅順協辦大學士沈兆霖爲戶部
尚書朱鳳標爲兵部尚書戊子哈祭太廟是歲免江蘇浙江安徽三省額賦通
賦又直隸山東河南江西湖北湖南福建廣西等省四百一州縣衛被災被賊
額賦有差會計天下民數二萬六千零九十二萬四千六百七十五名口存倉
穀數五百二十三萬一千九百二十石四斗六升五合一勺朝鮮入貢

十一年辛酉上在木蘭春正月庚寅朔上御綏成殿受賀辛酉詔二月十三日
迴鑾乙未曾國藩奏楊載福勦賊克都昌解南陵圍田在田奏擒匪犯碭山擊
走之加提督銜丙申召翁同書來京以李續宜爲安徽巡撫丁酉以福濟爲成
都將軍辛丑賊陷孝豐杭州戒嚴壬寅詔紀年開秩應子特赦非常赦所不原
者咸減除之癸卯左宗棠兵復饒州暨都梁乙巳恒福以病免以文煜爲直隸
總督譚廷襄爲山東巡撫鄧爾恒爲陝西巡撫何冠英署貴州巡撫丁未僧格

林沁奏擒匪竄入山東派隊追勦及於荷澤失利得旨價格林沁督帶重兵北地倚爲屏障乃以飢疲之卒追方張之寇旁無援應宜其敗也勇往有餘未能持重尙其汰兵選將扼要嚴防謀定後動勿再輕進戊申詔袁甲三等擒匪裒脅良民未便概行誅戮可剴切曉諭設法解散投誠者免罪殺賊者敘功並傳知李世忠一體招撫辛亥貴州官軍克復獨山壬子翁同書奏陳撫練苗沛霖劫擾壽州跋扈異常詔李續宜酌辦河南擒匪竄擾東明長垣二月己未朔雲南官軍克復普甯壬戌復置奉天金州水師營丙寅詔准山東抵還法國教堂地基並勅直省遇有交涉即行酌辦請旨勿許推諉丁卯張玉良軍克復江山常山庚午曾國藩奏左宗棠敗賊於景德鎮鮑超敗賊於石門洋塘壬申浙軍克復富陽熱河朝陽盜匪陷城命克興阿勦之命明誼明緒會勘俄界英蘊奎英辦理俄人通商擒匪撲汝河副都統伊興阿總兵滕家勝逆戰陣歿乙亥陳玉成糾合擒匪由英山犯湖北蘄水詔胡林翼回兵擊之丁丑庚辰詔曰前經降旨訂日迴鑾旬日以來體氣未復緩俟秋間再降諭旨壬午朝鮮國王遣使

朝覲行在溫諭止之頒賜文綺珍器及其使臣癸未詔挑選兵丁演習俄國送到槍礮甲申裁撤黑龍江團丁歸農三月己丑朔詔派辦約大臣崇綸崇厚給與全權便宜行事勅侍郎成琦赴興凱湖會勘俄人分界事宜予道員聯捷四品京卿辦理河防壬辰恭親王奕訢請赴行在祇叩起居上手詔答之曰別經半載時思握手而談惟近日欵嗽不止時有紅痰尙須靜攝未宜多言且俟秋間再爲面話丙申詔皇長子於四月七日入學以李鴻藻充師傅戊戌都興阿奏鎮揚水師船隻年久損壞請飭廣東購運紅單船應用從之庚子命勝保督辦直隸山東勦匪以賈臻署安徽巡撫庚戌英法兩國兵退出廣東省城辛亥以前大學士彭蘊章署兵部尙書甲寅浙江賊陷海鹽平湖乍浦副都統錫齡阿死之內辰廣西土匪陷太平府養利州夏四月己未朔嚴樹森奏賊犯汝甯道員張曜擊走之戊辰山東捻匪教匪連陷館陶七縣僧格林沁入滕縣固守詔勝保分兵援之甲戌詔曰朕聞各處辦捐有指捐借捐礮船捐畝捐米捐餼捐隄工捐船捐房捐鹽捐板捐活捐名目滋多員司猥雜其實取民者多歸公

者寡近年軍餉浩繁不得已而借資民力商力然必涓滴歸公撙節動用始得實濟若似此徵求無藝賡薄民生尙復成何政體各大臣督撫尙其嚴密稽查剔除奸蠹以副朕意乙亥左宗棠敗賊於樂平庚辰山東教匪撲圍大名聯捷擊走之癸未皖賊復竄浙江陷常山玉山進逼衢州五月癸巳田在田奏苗練犯符離勅僧格林沁分兵援之甲午鄧爾恒被戕於曲靖飭劉源灝查辦以瑛梁爲陝西巡撫庚子勝保奏克復館陶辛丑命賈臻李世忠幫辦袁甲三軍務甲辰命多隆阿幫辦官文胡林翼軍務乙巳賊陷浙江壽昌金華龍游湯谿長興進陷蘭谿武義詔催左宗棠赴援六月戊午朔日有食之庚申曾國藩胡林翼奏安慶省城自我軍長圍逆酋陳玉成率黨回援安慶於集賢關外赤岡嶺堅築四壘經鮑超成大吉會合多隆阿馬隊奮力進勦晝夜轟擊五月初一日三壘俱降釋去脅從將長髮老賊概行正法其踞第一壘之賊劉滄琳乘夜潛遁經鮑超殲於馬踏石餘爲水師斬戮殆盡並將劉滄琳驗明支解梟示得旨嘉獎布魯斯亞國換約通商辛酉許俄人在庫倫恰克圖通商乙丑欽天監奏

八月初一日日月合璧五星聯珠得旨不必宣付史館甲戌賊陷浙江遂昌松陽永康丙子回匪撲殺喀什噶爾詔景廉赴阿克蘇防勦丙戌浙江官軍克復長興秋七月丁亥詔每年秋間王公致祭兩陵如遇山水漲發可在途守候道路通時即行前往屆期不到由守護之員勅公等行禮甲午曾國藩奏收復安徽徽州戊戌子四川陣亡侍衛昭勇侯楊炳建祠辛丑上不豫壬寅上大漸召王大臣承寫硃諭立皇長子爲皇太子癸卯上崩於行宮年三十一十月奉移梓宮至京十二月恭上尊諡同治四年九月葬定陵

論曰文宗遭陽九之運躬明夷之會外強要盟內孽競作奄忽一紀遂無一日之安而能任賢擢材洞觀肆應賦民首杜煩苛治軍慎持馭索輔弼充位悉出廟算嚮使假年御宇安有後來之伏患哉

清史稿

本紀二十一

穆宗本紀一

穆宗繼天開運受中居正保大定功聖智誠孝信敏恭寬毅皇帝諱載淳文宗長子母孝欽顯皇后那拉氏咸豐六年三月二十三日生於儲秀宮十一年就學編修李鴻藻授讀七月文宗不豫壬寅疾大漸召御前大臣載垣端華景壽肅順軍機大臣穆蔭匡源杜翰焦佑瀛宣諭立爲皇太子命載垣端華景壽肅順穆蔭匡源杜翰焦佑瀛贊襄政務癸卯文宗崩召陳孚恩文煜赴行在甲辰尊皇后及聖母並爲皇太后諭軍機處於各摺片後署贊襄政務王大臣乙巳免悼親王恭親王醇郡王鍾郡王孚郡王尋常召對及宴賚卽拜停各省貢獻方物丙午展順天文鄉試於九月舉行恩科武會試於十月順天武鄉試於十一月授駱秉章四川總督督辦軍務召雲貴總督劉源灝來京以福濟代之以崇實爲成都將軍旋命協辦四川軍務湖北官軍復武昌咸甯通城等縣及江西義甯州戊申以景敘爲駐藏辦事大臣己酉九恭親王赴行在叩謁梓宮庚

戊薛煥請招商試運淮鹽濟餉議行辛亥粵匪陷吉安廣西官軍復賓州癸丑
加上宣宗帝后尊諡甲寅粵匪陷靖安武甯義甯各州縣乙卯定年號祺祥八
月丁巳朔日月合璧五星聯珠粵匪陷嚴州旋復之戊午官軍復新昌奉新瑞
州上高己未命景廉赴葉爾羌查辦英蘊斂錢擅殺事允曾國藩請以上海見
船輪船駛往皖江歸其軍練習辛酉湖北官軍復德安壬戌江西官軍復武甯
靖安癸亥頒大行皇帝遺詔勝保軍復濮州丁卯擒匪渡運河諭勝保與僧格
林沁等截剿母任北竄戊辰胡林翼以疾乞假命李續宜暫署湖北巡撫庚午
御史董元醇請皇太后權理朝政簡親王一二人輔弼載垣等擬旨駁飭甲戌
曾國荃軍復安慶戊寅廣西官軍復潯州庚辰四川番賊陷松潘辛巳論復安
慶功加官文曾國藩太子少保胡林翼太子太保並子騎都尉世職賞李續宜
黃馬褂楊載福多隆阿雲騎尉世職癸未上大行皇帝尊諡曰協天翊運執中
垂謨懋德振武聖孝淵恭謙仁寬敏顯皇帝廟號文宗苗沛霖陷正陽霍邱圍
壽州九月丙戌朔上母后皇太后徽號曰慈安聖母皇太后徽號曰慈禧辛卯

楊載福軍復池州壬辰擒匪竄汜水鞏縣官軍擊退之召張亮基來京金州地
震甲午川軍剿平會理回匪丁酉允樂斌等奏撤撤回匪降撤回官軍庚子川
軍復名山壬寅多隆阿曾國荃等復桐城宿松蘄州黃梅廣濟彭玉燾成大吉
等復黃州湖北巡撫胡林翼卒調李續宜爲湖北巡撫仍駐鄂皖交界督辦軍
務擢彭玉燾爲安徽巡撫癸卯浙江官軍復於潛昌化粵匪竄嚴州張玉良等
軍潰甲辰英法撤廣州駐兵英撤駐天津馬隊乙巳僧格林沁剿平青州等處
竄擒賞還御前大臣並黃韜戊申上奉大行皇帝梓宮返京師免承德及宛平
各府縣田賦己酉苗沛霖反命袁甲三會賈璣諸軍討之甲寅上奉母后皇太
后聖母皇太后還宮乙卯以擅改諭旨力阻垂簾解載垣端華肅順任罷景濤
穆蔭匡源杜翰焦佑瀛軍機命恭親王會同大學士六部九卿翰詹科道按律
覈奏賈植周祖培沈兆霖趙光疏請政權操之自上並議皇太后召見臣工禮
節及辦事章程勝保疏請皇太后親理大政並簡親王輔政命王大臣大學士
等定議以聞召醇郡王奕譞來京是日奪載垣端華肅順爵職逮問議罪命睿

親王仁壽醇郡王奕譞逮肅順解京詔文武各衙門自十月十六日以後輪班
值日鮑超軍復鉛山是月免西甯碾伯被擄額賦冬十月丙辰朔命恭親王奕
訢爲議政王在軍機處行走大學士桂良戶部尙書沈兆霖侍郎寶鋆文祥並
爲軍機大臣鴻臚寺少卿曹毓瑛在軍機大臣上學習行走召盛京戶部侍郎
倭仁來京丁巳諭求言申嚴門禁戊午大行皇帝梓宮至京奉安於乾清宮庚
申詔改祺祥爲同治辛酉恭親王等擬請載垣端華肅順照大逆律凌遲詔賜
載垣端華自盡肅順處斬礮景壽穆蔭匡源杜翰焦佑瀛職穆蔭遣戍軍臺壬
戌礮陳孚恩黃宗漢劉岷成琦德克津太富績職諭不究既往諸臣毋再請察
辦黨援申誡王公內外文武大臣招權納賄甲子上御太和殿卽皇帝位受朝
頒詔天下以明年爲同治元年加恩中外罪非常赦所不原者咸赦除之免悼
親王恭親王醇郡王鍾郡王孚郡王諡旨及奏疏稱名乙丑懿旨以物力維艱
誠內務府宮闈器用力行節儉賞還僧格林沁博多勒噶台親王命刑部嚴結
五字鈔票案通諭中外清理庶獄丙寅苗沛霖陷壽州東南方有聲如雷諭熱

河未竟工程即時停止丁卯申誠各路統將粉飾遷延縱寇殃民補行咸豐十年恩科武會試己巳命總兵馮子材督辦鎮江軍務庚午諭議政王等贊理庶務毋避小嫌壬申諭統兵大臣實核功罪信賞必罰癸酉粵匪陷嚴州餘杭命曾國藩統轄蘇皖贛浙軍務節制巡撫提督以下各官瑞昌幫辦浙江軍務太常寺少卿左宗棠赴浙江剿賊調遣提鎮以下官丙子申諭郊配仍以三祖五宗爲定皇考祔廟稱宗起用予告大學士祁寯藻翁心存前太常寺卿李棠階籍陳孚恩家下獄治罪官軍復無爲及隨州丁丑申誠廷臣遇事因循諭官文曾國藩等妥籌剿撫苗練粵匪陷蕭山紹興及江山常山趨左宗棠軍速援己卯釋貝子德勒克色倫於獄辛巳廷臣議上垂簾章程懿旨依議詔開恩科初烏拉停捕珠八年至是諭仍停辦壬午陳孚恩戍新疆命侍郎寶璽董恂在總理各國事務衙門辦事甲申法兵去天津十一月乙酉朔上奉慈安皇太后慈禧皇太后御養心殿垂簾聽政丙戌諭各省習教交涉分別良莠持平辦理丁亥諭定戶部五字鈔票侵款者罪復熙麟等官庚寅命各軍保薦將才壬辰山

東教匪作亂成祿等剿平之匪首延秀輸伏誅甲午先是張亮基言雲南副將何有保戕鄧爾恒疑徐之銘主使至是之銘飾奏軍功爲有保請獎諭福濟察辦撤任嚴參乙未石達開竄綏寧庚子諭中外舉人才以曾國藩胡林翼駱秉章爲法辛丑粵匪陷紹興諸暨禔王履謙職逮問壬寅福濟以畏葸取巧褫職賞潘鐸二品頂戴署雲貴總督僧格林沁剿壽張等處會匪大捷癸卯命彭玉慶幫辦袁甲三軍務官軍復來安乙巳給事中高延祐劾徐之銘貪淫荒謬及滇省練黨縱恣諭潘鐸查辦丁未詔各省察舉循良並訪學行該備之士庚戌以吳棠爲江甯布政使兼署漕運總督督辦江北糧台癸丑粵匪陷處州十二月甲寅朔諭曾國藩通籌進剿機宜乙卯諭譚廷襄赴東昌籌河防濮范教匪平丁巳勝保奏收撫匪首劉占考宋景詩戊午國瑞軍復范縣粵匪陷寧波鎮海暨紹興各屬己未諭整頓鹽務辛酉命左宗棠迅速援杭張運蘭歸調遣得專奏軍事壬戌命江甯副都統魁玉幫辦鎮江軍務以毛鴻寶言諭督撫及統兵大臣因地選將毋專恃楚勇袁甲三軍復定遠允廓爾喀例貢改丁卯年呈

進乙丑福建會匪陷福鼎尋復之河南捻匪竄東陽丁卯會國藩辭節制四省軍務不允己巳上孝德皇后尊諡曰孝德溫惠誠順慈莊恭天贊聖顯皇后兵部侍郎慶英有罪褫職戍新疆以青海札薩克貝勒綱僧却多布爲左翼盟長辛未褫毓科職擢沈葆楨爲江西巡撫命恭親王醇親王督瑞麟文祥等管理神機營會國藩奏派遣道員李鴻章統水陸軍赴鎮江規復蘇常九之定登萊青道駐烟台監督東海關稅務壬申降端華載垣世爵爲不入八分輔國公甲戌免安徽江蘇浙江被賊來年額賦乙亥允江忠義終制田興恕兼署貴州巡撫旋以韓超署任命張亮基督辦雲南軍務徐之銘免雲南巡撫以亮基署之丁丑多隆阿軍進攻廬州石達開竄沅江黔陽偏川境諭駱秉章田興恕合擊之兩准粵匪陷杭州瑞昌王有齡死之褫閩浙總督慶端職留任以左宗棠爲浙江巡撫彭玉麟辭巡撫請專辦賊許之以爲水師提督調李續宜爲安徽巡撫嚴樹森爲湖北巡撫以鄭元善爲河南巡撫戊寅祁寯藻以大學士銜爲禮部尙書改彭玉麟以兵部侍郎候補庚辰捻匪圍潁州勝保論劾嚴樹森諭令反

躬自責保全名節副皇考委任之意以薛煥言諭總理各國事務衙門與英法籌商借兵剿賊壬午追封皇弟二阿哥爲憫郡王趣左宗棠進取浙江命勝保率部赴穎州癸未僧格林沁擊竄匪於曹州河南岸殄之

同治元年壬戌春正月甲申朔慈安皇太后慈禧皇太后御慈寧宮上率王大臣行禮御乾清宮受賀自是每歲皆如之命麟魁曾國藩協辦大學士乙酉詔酌撤敵捐釐捐拊循從征將士家室撫慰傷亡兵勇子孫以江西肅清賞鮑超黃馬褂李世忠復六合賞亦如之丙戌諭曾國藩左宗棠保衢州進解徽州圍命曾國藩選將保上海調蔣益澧部赴左宗棠軍庚寅勝保移軍穎州命副都統遮克敦布道員王榕吉接辦防務辛卯川軍復丹稜匪首藍潮鼎伏誅官軍復平越壬辰李世忠軍復天長癸巳粵匪李秀成陷奉賢南匯川沙命都興阿以艇師扼吳淞口丙申樂斌以縱匪殃民解任訊辦命麟魁署陝甘總督與沈兆霖剿撫撤回粵匪竄逼上海薛煥言英法各員協同防剿上嘉之丁酉初綿性請改徵回賦景廉赴阿克蘇勸辦之及是景廉覆劾絳性坐褫職尋戍吉林

回子郡王愛瑪特解回庫車管束申誠回疆各大臣勿再攤徵命英蘊察禁私典阿克蘇各城回地戊戌粵匪犯鎮江馮子材軍擊退之擒匪竄沅陽諭僧格林沁南北兼顧官軍復莘縣己亥麟魁卒李世忠軍克江浦浦口撤慶端任命耆齡赴閩接辦浙軍務庚子擢鮑超爲浙江提督馮子材爲廣西提督癸卯命喬松年督辦沿江團練丙午前安徽巡撫翁同書以失壽州定遠褫職逮問尋論斬丁未加鑄阿克蘇錢戊申文煜等上北塘防守事務允行英法留兵駐大沽砲臺雲南官軍復麗江回匪竄昆明庚戌粵匪竄松江官軍合外兵迎剿大敗之洋將美人華爾願隸中國籍賞四品頂戴花翎壬子命張亮基募軍赴滇癸丑諭遮克敦布等會剿河套擒匪二月甲寅朔官軍復來鳳乙卯懿旨皇帝在弘德殿入學讀書祁寯藻翁心存授讀丙辰擢曾國荃江蘇布政使並令辦理軍務毋庸迴避丁巳粵匪陷黃巖官軍解鎮江徽州圍辛酉西南辦事大臣多慧提督成瑞以節言撤匪投誠並褫職議罪尋論斬樂斌以庇護褫職戊新疆壬戌命都興阿遣兵駐天長六合李世忠移軍江浦浦口和衷共濟粵匪

陷安義旋復之癸亥擒匪圍杞縣甲子以倭仁所進古帝王事蹟及古今臣工
奏議陳弘德殿講肄乙丑僧格林沁軍擊擒匪大捷賊由杞縣竄通許追剿之
戊辰石達開竄鄆都允田興恕請解欽差大臣率部赴川歸路秉章節制命韓
超籌貴州防剿事己巳薛煥言會英法軍剿高橋賊壘克之美人白齊文願入
華籍賞四品頂戴花翎壬申金陵粵匪渡江擾江浦等處諭曾國藩都興阿抽
調師船截擊之癸酉多隆阿軍進攻廬州丙子以上海株涇陷褫提督曾秉忠
職上海官軍會英法軍剿除蕭塘賊壘命崇厚成明督辦天津海防丁丑復鄭
親王怡親王世爵諭李續宜安集皖北流亡是月免汀州等處被擾夏賦三月
癸未朔擒匪竄太和甲申允英法派師船往長江協同防剿丙戌粵匪竄上海
薛煥軍擊敗之戊子賊陷青田允鄭元善請以丁憂布政使張曜專辦剿匪庚
寅自正月以來不雨詔修省求直言左宗棠復遂安宋景詩降衆叛於蘭儀壬
辰粵匪犯廬和及江浦甲午勝保軍進援潁州大捷丙申鄭元善言招回宋景
詩令帶罪圖効允之戊戌命李續宜鄭元善幫辦勝保軍務辛丑前府尹蔣琦

齡應召陳崇正學疏通正途限制津貼抽釐籌軍實等十二策議行惟停養廉查陋規以妨政體不許詔各省舉孝廉方正務求真儒癸卯命沈兆霖督軍赴西甯剿撤匪乙巳萬壽節停受賀丙午趣曾國藩分軍援湖州丁未彙纂帝王政治及前史垂簾事跡書成名治平寶鑑己酉命副都御史晏端書赴廣東督辦釐金吳棠督辦江北團練命薛煥以頭品頂戴充通商大臣以李鴻章署江蘇巡撫京口副都統海金剿賊失利死之壬子免回疆新舊應進貢物是月上躬詣大高殿祈雨者三四月甲寅諭統兵大臣慎重餉糈汰除浮費景其溶上歷代君鑑上嘉納之乙卯允駱秉章奏留田興恕仍辦貴州軍務丁巳粵匪陷宜陽尋復之戊午兩鮑超軍復青陽曾國荃軍復巢縣含山和州己未普承堯戍軍臺曾國藩等言蘇紳請借英法兵規復蘇常斷不可行上慰其議令李鴻章裁制華爾常勝軍粵匪李世賢竄江西沈葆楨赴廣信督辦防剿比利時請換約諭薛煥妥酌籌辦庚申上孝靜成皇后尊諡曰孝靜康慈懿昭端惠弼天撫聖成皇后壬戌命薛煥爲全權大臣辦理比國通商事務癸亥賊陷漢中乙

丑川軍復青神左宗棠解衢州江山圍丙寅擒首張落刑北竄諭僧格林沁等
籌防以閩軍失利慶端諱報切責之戊辰曾貞幹復繁昌鮑超復石埭太平涇
縣上海軍會英法軍平南翔賊壘復嘉定庚午都興阿擊敗揚州竄匪官軍復
額上粵匪陷孝義鎮安豫軍復永甯辛未以葉爾羌阿奇木克伯郡王阿克拉
伊都達例攤捐擅殺回衆奪郡王治英蘊罪壬申西安副都統烏蘭都剌賊失
利諭官文鄭元善分兵赴陝丙子臺灣會匪陷彰化粵匪竄偏西安趣官文鄭
元善飭兵會剿丁丑上慈安皇太后慈禧皇太后徽號頒詔覃恩有差戊寅多
隆阿軍克廬州匪首陳玉成遁至壽州境苗沛霖誘擒之命免沛霖罪己卯張
運蘭軍復旌德曾貞幹軍復南陵撤回圍攻巴燕戎格沈兆霖援剿之上海官
軍復青浦庚辰何桂清逮至京命大學士會刑部審擬是月免安州等州縣被
水通賦五月壬午朔官軍復寧波鎮海癸未鄭元善移軍汝甯粵匪陷陝西山
陽命多隆阿督辦陝西軍務甲申兩命吳振械趣山西協辦防剿乙酉命明誼
速赴塔城與俄會勘地界徐宗幹剿臺灣匪丙戌賜徐郁等一百九十三人進

士及第出身有差丁亥以諸賢農民包立身練勇殺賊諭左宗棠酌用之李世忠軍截剿江南援賊大捷己丑廣西官軍復太平劉長佑赴潯州督剿粵匪陷渭南壬辰成王履謙新疆粵匪圍溫州瑞安諭慶端等進接並令左宗棠兼顧粵匪犯潼關諭沈兆霖檄馬德昭援陝乙未彭玉崧曾國荃各軍復太平賢蕪湖城金柱關東梁山各隘賞李成謀黃馬褂官軍會英法軍克南橋柘林奉賢各城南橋攻克時法提督卜羅德陣沒上嘉悼之賜祭賞其家屬珍物丙申粵匪竄陝州以銅仁石阡苗教各匪猖獗諭毛鴻賓韓超會剿戊戌命侍郎恒祺會崇厚辦理葡國通商事務時英國擬調印度兵助剿諭曾國藩等迅克金陵蘇常以杜覬覦己亥粵匪陷興義官軍復崔邱庚子前太常寺少卿李棠階疏請於師傅匡弼之餘預杜左右近習之漸並講御批通鑑輯覽及大學衍義優詔答之辛丑官軍復台州府仙居黃巖等六縣賊目吳建瀛等以南匯降官軍復川沙賊陷嘉定免直隸積欠旗租壬寅官軍進攻雨花臺甲辰允曾國藩議仍以安慶爲省治設長江水師提督駐蕪湖命恆祺爲辦理葡國通商全權大

臣總理各國事務衙門言法使照會田興恕虐害教民命駱秉章勞崇光查辦
乙巳陳玉成解京師詔於中途磔之汝州練目李瞻謀叛官軍剿滅之丙午李
世忠軍渡江克龍潭等處賊壘進攻九沃洲諭曾國藩節制諭明誼按條約地
圖與俄剖析界務錫霖襄辦北路分界事宜丁未官軍復陝西山陽戊申踞山
陽賊竄鄖西戊英蘊盛京川匪陷太平廳竄擾陝西定遠張芾撫叛回于臨潼
縣被執死之辛亥彭玉慶曾國荃等軍克秣陵關諸隘進逼金陵粵匪陷湖州
在籍福建糧道趙景賢死之六月壬子朔耆齡以援浙逗留褫職仍留任乙卯
諭李續宜調度淮北剿捻事並約束苗沛霖丙辰僧格林沁等軍克金樓賊壘
戊午命六部九卿再議何桂清罪庚申川匪陷西鄉官軍復定遠李鴻章督程
學啓等軍剿粵匪大敗之西安同州漢回械鬪燒殺渭北村鎮諭分別剿撫但
辨曲直不論漢回壬戌川軍復太平癸亥粵匪陷鄖西甲子何桂清論斬乙丑
直隸蝗丙寅粵匪由伊洛南竄命勝保督剿之陝回撲西安及同州趣雷正綰
入關戊辰申誠統兵大臣欺飾濫保督撫嚴禁州縣藉災請緩仍復私征庚午

賊匪陷天柱癸酉大學士桂良卒贈太傅頒廓爾喀王獎勵敕書甲戌詔難民陷賊來歸者概予免罪申嚴失守城池律定比利時通商條約常清等言俄人稱哈薩克汗阿克坦沙拉已屬俄諭查實的辦令各台吉別舉襲汗爵者乙亥嚴諭文煜等緝直隸馬賊諭譚廷襄赴兗沂督剿各匪及竄捻丙子官軍復青田丁丑允僧格林沁請收撫苗沛霖己卯石達開竄綦江官軍大敗之遂竄拱高等縣庚辰趣多隆阿援西安剿回匪毋爲撫議所誤仍解散被脅良回是月免直隸河南逋欠及雜糧秋七月壬午朔甲申安集延匪倭里罕入喀什噶爾卡滋撥官軍剿敗之浩罕亂伯克邁里被殺丁亥命景紋調達木蒙古兵及夥爾等族番兵赴藏己丑以陝回慘殺漢民促多隆阿等入關尋諭責其遷延令勝保分軍援陝袁甲三以病免命李續宜爲欽差大臣督辦軍務庚寅李鴻章軍克金山衛辛卯甘肅撤回降安集延賊遁出卡俄人稱哈薩克布魯特爲其國地命常清察覈總理各國事務衙門副理明緒會明誼勘西界事宜壬辰命倭仁協辦大學士甲午川匪陷洋縣戊戌川軍復長甯命愛仁王茂蔭密察陝

西史治擢知州秦聚奎大順廣道會遮克敦布辦直東防務己亥以縱兵劫掠
襁總兵田在田職庚子沈兆霖督剿撤回還至平番山水暴發卒粵匪竄南陽
命勝保入陝督辦軍務節制各軍命熙麟爲陝甘總督允馮子材請簡汰鎮江
軍癸卯毛鴻賓剿黔匪連捷諭韓超規復失地劉長佑解散瑤人毛鴻賓會剿
黔桂各匪甲辰閩軍復宣平松陽瑞安以慶端爲福州將軍耆齡爲閩浙總督
乙巳李續宜母喪詔奪情署安徽巡撫丙午彗星見西北方中葡商約成命僧
格林沁統豫魯軍務節制督撫以下與李續宜商辦安徽剿匪事宜總理各國
事務衙門請設同文館習外國語言文字允之丁未鮑超軍復甯國諭刑部清
景甯雲和鄂軍復邯西初廣東恩平陽春新興等縣土客理庶獄戊申以星變
詔求直言官軍復互鬪九年未解至是諭勞崇光諭止之豫籌善後庚戌林福
祥米興朝以失守逃避處斬諭都興阿實數沿江釐稅雲南回匪陷永昌龍陵
騰越是月免江西義甯等州縣逋賦蘆課八月辛亥朔以台州民團克復郡縣
詔蠲同治元二年錢糧壬子李鴻章軍克青浦申諭督撫痛除捐輸抽釐遏勒

諸弊癸丑准京官俸減成搭放見金甲寅回匪圍咸陽等城諭勝保入潼關督剿乙卯褫呼徵呼克圖克圖名號及黃糧以藏事收平停調番兵及川餉詔順直捕蝗己未徐之銘請阻張亮基帶兵入滇諭責其爲回人挾制不允辛酉諭嚴防陝匪旬結甘回壬戌諭勝保分兵赴山西英桂籌省防務癸亥諭勝保剿渭北多隆阿剿渭南回匪兼顧鎮平甲子資遣林自清練衆回滇乙丑陝回圍朝邑特普欽等言呼蘭墾民日衆請設理事同知等職議行命傅振邦襄辦譚廷襄軍務丙寅諭各省清查流品丁卯李續宜給假治喪以唐訓方暫代命福濟會景敘辦理藏事命僧格林沁節制淮北軍剿撫苗捻辛未陝回西竄同州朝邑路逆曾洪容海詣鮑超軍降率所部克廣德壬申北新涇圍解滬防肅清癸酉甘回竄鳳翔粵捻合犯浙川陷竹谿竹山甲戌允王大臣請停送奉移山陵命議近支親王恭代典禮鎮江設關徵洋稅丙子諭勝保檄馬德昭軍駐長武一帶防回匪竄甘擢雷正綰陝西提督丁丑臺灣軍解嘉義圍復處州府及縉雲城命總兵黃開榜接統田在田軍戊寅允直隸增募馬勇緝馬賊官

軍復青谿命耆齡專辦援浙軍務己卯山東軍剿擒匪大捷勝保奏敗回匪於斜口西安解圍匪竄渭北諭以自便責之命雷正綰襄辦勝保軍務復浙江餘姚廣西陽朔以粵匪竄圍鄉促鄭元善軍赴河洛閏八月辛巳朔慶端軍復緝雲甲申多隆阿軍克荆紫關乙酉鄂軍復竹山竹谿黔軍復天柱邛水粵匪竄老河口回匪圍涇陽飭雷正綰軍進剿西安解嚴丁亥法庫門回民互鬪玉明等解散之趣文煜譚廷襄捕直東界馬賊戊子回匪復攻西安滇匪由川竄坤坪粵匪由閩鄉竄永甯允河南收長蘆鹽釐濟餉己丑洪容海降衆復叛踞廣德辛卯多隆阿軍剿擒匪大捷解商南圍調駐南苑吉黑馬隊赴山西壬辰諭韓超與提督江忠義商辦貴州軍務堵截林自清擁衆入黔命李棠階爲軍機大臣以德勒克多爾濟等增兵巡河防甲午諭各省裁革州縣浮費命京控案件專責按察使訊鞫乙未詔薦舉人才命薛煥李鴻章辦理普國換約事宜飭各省迅解京餉丙申命倭仁爲大學士諭多隆阿扼守武關戊戌多隆阿剿毫穎西竄擒匪大捷賞黃馬褂粵匪復陷慈谿官軍合英法軍復之華爾沒於陣

庚子諭勞崇光等籌濟京倉米穀江蘇等省新漕征收本色解京張亮基劾徐之銘岑毓英跋扈尤法將勒伯勒東留防寧波諭潘鐸安撫雲南漢回辛丑九袁甲三回籍命唐訓方赴臨淮接辦軍務馬新貽暫統甲三軍曾國藩請簡大臣會辦軍務上不許仍慰勉之並傳旨存問疾疫將士諭景綸等嚴緝吉林教匪壬寅命富明阿馳赴揚州襄辦都興阿軍務癸卯勝保請撫三原等處回匪不許甲辰以劉長佑爲兩廣總督允田興恕暫留貴州剿匪乙巳石達開竄綦江等處官軍剿擊敗之回匪竄邠州資雞等處丙午河南擒匪李如英降戊申石達開竄仁懷己酉命官文爲文華殿大學士倭仁爲文淵閣大學士九月辛亥孝靜成皇后升祔太廟頒詔覃恩有差豫擒竄內鄉新野壬子御史劉慶請以招流亡墾地畝課州縣治績從之甲寅允沈葆楨請挑練額兵酌籌津貼乙卯以文宗奉移山陵獨經過州縣額賦諭文煜選良有司籌辦畿輔水利丙辰直隸妖人王守青等編造逆書事發伏誅丁巳諭鄭元善毛昶熙夾剿西南兩路擒匪曾國藩言馭苗沛霖宜赦其罪而不資其力避之戊午廣東土匪黃金

龍李植槐等倡亂官軍討平之趣多隆阿督所部入陝其竄隨棗之匪令穆圖善軍剿之己未勝保請調苗沛霖入陝助剿不許川匪竄甯陝官軍敗之於子午谷庚申石達開竄桐梓癸亥以閩粵魯省玩視軍餉予疆臣嚴議並嚴定欠解京餉處分甲子粵酋李秀成大舉援金陵陳德才陷應城孝感官軍復之安徽軍克湖溝賊巢丙寅僧格林沁軍克亳州擒巢陝回圍鳳翔庚午馮子材克湯岡賊巢靈州回亂趣李續宜赴軍壬申回衆撲同朝諭勝保親往督剿雷正綰督剿咸陽以北癸酉浙軍復壽昌甲戌以勒索回商褫庫倫大臣色克通額職戍新疆革庫倫茶票陋規李鴻章軍合英法軍復嘉定尤荷蘭立約通商乙亥鄂軍復京山粵匪竄黃陂黃安諭曾國藩等選武弁在上海甯波習外國兵法令閩越等省仿行丙子豫軍克龍井賊巢召蘇廷魁曾望顏劉熙載黃彭年朱琦等來京仍命各省舉行團練丁丑詔畿輔行堅壁清野法諭曾國藩等豫選將弁演習外國船礮己卯享太廟冬十月庚辰朔川軍克龍缸場匪首李詠等伏誅賞提督胡中和黃馬褂辛巳粵匪大股圍南翔等處滬軍勝保赴潼關

剿匪癸未湖南援軍會復修仁命勞崇光赴黔察辦田興恕殺教民案以張凱嵩接辦廣西軍務丙戌文宗顯皇帝孝德顯皇后升祔奉先殿上親詣行禮戊子命瑞常協辦大學士己丑命曹毓瑛爲軍機大臣庚寅豫軍剿捻勝之解臨穎圍趣勝保赴朝剿匪勝保仍請調苗沛霖赴陝諭嚴斥之官軍復奉化徐之銘言招撫興義回匪諭稱其爲滇回所制令潘鐸截回委員毋俾之銘預黔事辛卯延安回匪作亂英桂辦河曲保德團防命李鴻章選將統常勝軍實授江蘇巡撫甘回竄過花馬池癸巳黔軍剿敗石達開遵義圍解石達開竄仁懷乙未諭奉天嚴緝盜匪裁故洋將華爾所部兵勇准俄兵船在上海助剿毋入江定嗣後外人領兵毋易服色例德楞額軍潰於山東詔褫職查辦丙申夏軍剿回失利陝回竄清水戊戌命僧格林沁剿山東幅匪己亥江南軍擊退金柱關賊庚子譚廷襄罷命丁憂按察使閻敬銘署山東巡撫辦理軍務癸卯命穆騰阿襄辦勝保軍務乙巳諭刑部今年例停旬決何桂清統兵失律僅予斬候已屬法外之仁茲已屆期若因停旬再緩久稽顯戮何以謝死事者暨億萬

生靈著卽處決自後如遇停旬之年情罪重大之犯仍特奏聞取旨初徐之銘委回人馬聯升署安義鎮回匪因踞普安城至是事聞諭之銘撤回馬聯升迅查釀變情形具奏十一月己酉朔日有食之以沈宏富署貴州提督接辦田興恕軍務庚戌擢長沙知府丁寶楨署山東按察使壬子鄭元善以廢弛降道員命張之萬署河南巡撫諭毛昶熙裁所部兵勇臺灣會匪陷斗六門甲寅褫黃彬職撤其幫辦命吳全美接統水師歸曾國藩都興阿節制丙辰翁心存卒贈太保曾國荃軍剿金陵援賊大捷賞國荃及蕭孚泗黃馬褂戊午官軍合英法軍復上虞嵯新昌己未彭蘊章卒庚申金陵粵匪竄擾高資馮子材軍擊退之壬戌勝保坐驕恣欺罔褫職逮問諭直隸舉行保甲諭瑞麟嚴緝熱河匪徒癸亥秦聚奎剿匪冠縣沒於陣九洲賊復陷和州含山巢縣乙丑宣示勝保罪狀籍其貲賞所部兵勇授多隆阿欽差大臣接統勝保所部各軍丙寅川匪陷佛坪官軍復之川匪復陷略陽己巳粵匪竄陷祁門平羅回匪亂辛未閔敬銘請終制不允乙亥山東降衆叛陷濮州命張亮基以總督銜署貴州巡撫兼署

提督撤署巡撫韓超署提督田興恕任候查辦丙子石達開陷筠連川匪陷兩
當旋復之丁丑法使以教士被戕責田興恕抵償不許十二月戊寅朔諭江浙
等處被賊脅從誠心歸順者無論從賊久暫均許投誠諭會國藩唐訓方分軍
駐正陽關壽州庚辰白齊文有罪褫頂帶逮治之辛巳多隆阿破回匪于同州
壬午命荊州副都統薩薩布赴直魯剿賊癸未江南軍復績溪祁門鮑超丁母
憂命改爲署職仍留營官軍復濮州乙酉左宗棠軍復嚴州丙戌命雷正綰幫
辦多隆阿軍務將軍穆騰阿會瑛榮辦理省城防守事宜丁亥諭左宗棠等保
舉湘籍人才廣西匪陷西甯戊子回匪陷涇陽宋景詩叛於山西調阿拉善鄂
爾多斯蒙部兵助剿甯夏平羅回匪申諭舉孝廉方正粵匪竄平利河州回匪
肆擾恩麟剿之允普魯士換約滇匪陷景東改令席寶田軍援江西諭江忠義
節制援桂各軍山東竄匪擾冀州張強諭文煜等合剿甲午廣東舉人桂文燦
進經學叢書詔嘉勉丙申官軍復新甯復霍邱石達開再陷高縣旋復之丁酉
命侍郎崇厚幫辦直隸防剿召劉長佑來京命晏端書崑壽商辦廣東軍務戊

戊粵匪由邯陽竄興安諭多隆阿等會剿庚子賊目駱國忠等以常熟昭文降
壬寅諭穆騰阿瑛榮辦理西安防剿多隆阿兼顧省防甘匪竄陷隴州知州邵
輔死之癸卯召薛煥來京以李鴻章暫署通商大臣甲辰賊匪竄永年邯鄲等
處以遷延貽誤褫文煜遮克敦布職並遣戍以劉長佑爲直隸總督晏端書署
兩廣總督諭提督寶山接辦直東交界事務乙巳禘祭太廟丙午粵匪復竄甯
陝丁未粵匪圍興安分竄漢中是月免四川榮昌等縣福建甌甯等縣被擾額
賦江南湖灘積欠地租是歲朝鮮琉球入貢

二年癸亥春正月戊申朔免朝賀授張之萬河南巡撫辛亥予紹興傷亡洋將
勒伯勒東優卹甲寅詔曾國藩都興阿等舉堪勝水師總兵者匪陷武邑官軍
旋復之廣西軍復蓮塘戊午粵匪陷西安府鎮兩城陝西回匪竄鄠縣從瑛榮
請留馬德昭辦省防丙寅鮑超等軍復青陽戊辰命李桓赴陝接辦漢南軍務
庚午際對曾糾德爾格忒土司穆巴塘裏塘辛未畿南竄匪平甲戌以鳳翔困
守半年詔責瑛榮貽誤趣雷正綰馳救解圍二月丁丑朔左宗棠軍復金華湯

溪龍游蘭谿戊寅以李鴻章言諭兩湖用漕折購米運京免其稅庚辰李秀成等渡江北犯官軍擊敗之川軍剿石達開破之貴州回匪陷安南興義辛巳吉林軍敗朝陽流匪於興凱湖諭母令竄入俄界多隆阿剿回匪大捷克羗白鎖等賊巢壬午陝西團勇復興安粵匪竄漢陰紫陽李世忠請褫職贖勝保罪不許粵匪竄陷襄城旋復之癸未復永康武義乙酉譚廷襄赴東昌剿匪丁亥左宗棠移軍蘭谿東陽義烏浦江踞賊均遁己丑僧格林沁軍克雉河集賊巢擒首張落刑伏誅得旨嘉獎仍以親王世襲罔替免蒙亳等屬錢漕二年庚寅甯夏平羅回匪投誠辛卯以慶昫爲甯夏將軍癸巳畿南匪張錫珠竄大名以崇厚失機切責之趨劉長佑赴直隸馮子材敗賊於鎮江乙未左宗棠軍復紹興桐廬丙申滿慶等剿辦噶對逆匪黃國瑞軍克鄭城縣長城匪巢以追賊遲延褫崇厚職留任東匪竄曲周平鄉庚子諭恩麟等甘肅回匪毋輕議撫壬寅允平瑞請墾烏魯木齊等處閒荒馬廠升科濟餉以屯田之地分給屯兵癸卯粵匪陷江浦廣東匪踞信宜崑壽剿之甲辰浙東肅清獨新復各府州縣錢漕二

年乙巳趣閣敬銘赴東昌辦理軍務回匪馬化龍糾黨圍靈州旋赴固原投誠石達開由滇竄叙永丙午詔疆臣慎選牧令薄賦輕徭刪除煩苛與民更始是月免青神兵擾二年通賦三月戊申申禁河南豫征錢糧辛亥命崇厚回三口通商大臣任壬子命劉長佑節制直隸諸軍諭沈葆楨辦交涉當持平毋令紳民生衅癸丑諭曾國藩統籌江北軍務乙卯陝南粵匪陷紫陽旋復之雲南逆西逆匪犯昆明潘鐸死之以賈洪詔爲雲南巡撫內辰李鴻章軍克福山口命英將戈登約束常勝軍丁巳擒匪陷麻城戊午偪武昌省垣飭楚豫合軍攻剿己未燬浙江西安錢糧二年庚申丹國遣使拉斯那弗議立商約洋將達耳第福陣亡優卹回匪圍平涼以甘肅剿賊遷延褫署提督定安職逮問甲子耆齡遷福州將軍以左宗棠爲閩浙總督節制兩省軍務以曾國荃爲浙江巡撫仍統兵規金陵宗棠兼署之停福建本年例貢乙丑命王大臣覆覈勝保情罪甯國粵匪竄東流建德子秦儒毛亨明儒呂相從祀文廟內寅蒙城擒首賈文彬伏誅陝南粵匪陷沔縣貴州總兵羅孝連軍復定番長寨獨山荔波丁卯曾國

藩以失守江浦等城鑄級褫李世忠幫辦實授吳棠漕運總督仍節制江北軍務諭拊循江北難民己巳萬壽節停受賀庚午苗沛霖復叛官文等截剿蕪州竄賊癸酉褫徐之銘職逮問予潘鐸世職以雨澤稀少詔清理庶獄甲戌命福濟景紋查辦西藏啟衅事乙亥李鴻章軍復太倉隆德回匪亂黃國瑞軍平沂州根匪丙子詔察郵陝甘殉難被害良善回衆尋詔雲南亦如之是月上連詣大高殿祈雨夏四月戊寅御史吳台壽以疏奏袒勝保褫職苗沛霖陷懷遠山東匪劉得培踞潞川己卯官軍剿畿南匪張錫珠等竄高唐尋伏誅庚辰粵捻各匪竄擾廬江桐舒及黃州諭曾國藩駐守安慶勿撤金陵之圍壬午多隆阿軍克孝義匪巢飭劉蓉統軍援陝免浙江被陷各地額糧甲申苗沛霖圍壽州六安趣僧格林沁討之粵匪踞太平石埭左宗棠沈葆楨會防多隆阿軍克倉頭匪巢陝東肅清苗沛霖陷穎上犯蒙城命劉長佑督辦直魯豫交界剿匪事務乙酉劉典軍復黟縣命侍郎薛煥在總理各國事務衙門辦事戊子允英桂回駐太原庚寅劉長佑言匪首楊明嶺等投誠甘肅回匪陷鹽茶犯靜甯馬德

陷赴慶陽進勦壬辰贛軍敗賊祁門逆酋胡鼎文伏誅癸巳李繼宜請開畧缺
允之以唐訓方爲安徽巡撫李鴻章遣程學啓等軍薄崑山涇州軍擊回匪勝
之甲午禮部議定先賢先儒祀典位次頒行各省乙未開墾直隸新城一帶稻
田閻敬銘赴淄川督勦擒匪四竄河南總兵余際昌等死之命張曜接統其軍
丁酉以皖匪紛竄江鄂安慶可虞詔曾國藩堵柱艱難倍加謹慎左宗棠軍復
夥縣以勞崇光爲雲貴總督逮治田興恕以謝法人庚子粵捻各匪犯鳳台定
遠官軍擊退之辛丑賜翁曾源等二百人進士及第出身有差停四川畝捐癸
卯程學啟等軍復崑山新陽官軍敗賊曾李秀成於石澗埠乙巳回匪復犯西
安擊退之是月連祈雨免太倉等州縣額賦五月戊申苗沛霖圍蒙城己酉鮑
超軍復巢縣庚戌賞郎中李雲麟京卿節制漢南防兵及川省援兵壬子粵捻
合犯天長官軍擊敗之甲寅命江忠義統軍援江西丁巳郝縣教匪平獲匪首
劉雙印粵匪陷古州戊午俄兵入科布多增執台吉壬戌兩癸亥粵匪擾富陽
官軍擊退之總兵熊建益等陣沒官軍援平涼失利趣多隆阿分軍速援乙丑

甯夏撫回再叛鮑超軍復克巢和含山召宴端書來京以毛鴻賓爲兩廣總督
俾世臨爲湖南巡撫子明臣方孝孺從祀文廟戊辰諭購置輪船歸曾國藩李
鴻章節制己巳曾國藩爲弟國荃辭浙江巡撫上褒勉不允所辭西甯回蒙句
結撤匪攻丹噶爾廳惠遠回匪亂官軍捕誅之定丹國通商條約壬申彭玉麟
等軍復江浦浦口及九洲洲乙亥廣西軍復潯州六月丙子朔黔軍復普安安
南丁丑命明誼赴塔城會明緒等辦分界事戊寅詔曾國藩左宗棠等議滅江
蘇常鎮浙江杭嘉湖屬漕糧庚辰以復城池功賞李朝斌等及宋國永等黃馬
褂陞陝西例貢丁亥川軍勦賊於大渡河獲石達開誅之晉駱秉章太子太保
銜擢總兵唐友耕提督辛卯平羅回衆復叛瓦亭回匪圍隆德擊退之河決開
州考城河澤甲午苗沛霖陷壽州知州毛維翼死之乙未陝軍復甯羗己亥以
俄人強占住牧趣常清等定界勸俄兵撤回撫綏求內附之哈薩克布魯特壬
寅官軍復淄川獲劉得培等誅之甲辰寶慶土匪平命四川布政使劉蓉督辦
漢南軍務是月免福建順昌等縣屬被擾額賦江西義甯等州縣屬通賦雜課

秋七月乙巳苗沛霖偪臨淮唐訓方擊之丙午李鴻章軍復吳江震澤豫軍克張岡匪巢瑛榮有罪褫職命劉蓉爲陝西巡撫張集馨署之甲寅命李鴻章暫兼南洋通商大臣戊午貽軍復古州辛酉袁甲三卒於軍壬戌賜勝保自盡甲子官軍克沙窩等處匪巢允江北漕米仍征折色乙丑命劉蓉並節制湖北援軍丁卯官軍擊退狼山苗衆蒙城路通命崇厚爲全權大臣辦理荷蘭通商條約滇回陷平彝岑毓英軍復之癸酉命明誼等會同俄使辦分界諸務山東白蓮池教匪平文煜予釋擒匪逼開封是月免都勻等府廳州縣屬被擾新舊額賦並鳳凰等廳縣灘地積欠租銀八月丙子程學啟等軍大破賊於太湖楓涇等處進偪蘇州丁丑陝西曹克忠軍克附省等處賊巢戊寅西甯狄道河州洩回互鬪哈薩克句結俄兵擾伊犁趣四川何勝必軍援甘庚辰皖軍克長淮衛辛巳以畏葸褫馬德昭職多隆阿軍抵西安渭南肅清命陳國瑞幫辦吳棠軍務丙戌蘇軍克江陰丁亥成瑛榮新疆都興阿遣軍援臨淮己丑以勦辦臺灣賊匪調度乖方褫吳鴻源職逮問辛卯李鴻章赴江陰督勦諭陳國瑞援蒙城

調善慶部馬隊援臨淮熙麟遣軍援平涼乙未尤多隆阿請以曹克忠補河州
總兵並令嗣後提鎮缺勿擅請簡宋景詩竄開州命張集馨會穆騰阿籌辦西
安防守丁酉黔軍克桐梓賊巢普安陷旋復之命劉蓉節制毛震壽李雲麟各
軍調烏魯木齊阿克蘇兵助伊犁軍禦俄尤哈薩克綽坦承襲汗爵己亥趙林
文察渡臺剿匪庚子回匪陷平涼辛丑閻敬銘移軍東昌定荷蘭換約劉長佑
赴景州督勦是月免沁州等州廳縣屬逋賦九月乙巳朔命馬德昭赴慶陽營
沈葆楨乞病慰留給假戊申允李鴻章調知縣丁日昌來滬督製火器石泉知
縣陸堃聯團勦賊詔嘉之庚戌浙軍克富陽辛亥粵軍克廣海塞城癸丑諭僧
格林沁以礮隊赴蒙城助勦甲寅粵匪陷城固捻首張總愚等由汝州南竄乙
卯多隆阿軍復高陵丙辰穆隆阿以覆奏失實褫職調多隆阿爲西安將軍以
富明阿爲荊州將軍辛酉多隆阿軍克蘇家溝渭城賊巢甲子粵匪陷會同綏
甯旋復之陝西兵圍復沔縣乙丑李秀成援無錫程學啟等擊退之己巳僧格
林沁勦宋景詩股匪悉平景詩遁以援陝川軍敗褫提督蕭慶高職留營以漢

中失事褫布政使毛震壽職諭劉長佑閣敬銘辦直魯善後庚午御史馬元瑞
條陳薄賦稅慎訟獄善拊循動曉諭四事如所請行是月免直隸滄州等州縣
山東海豐等場未完竈課冬十月乙亥閣敬銘請終制不許官軍獲直東股匪
朱登峯等悉誅之內子捻首張總愚由魯山南召南竄己卯陶茂林軍解鳳翔
圍實授茂林甘肅提督命丁憂總兵成祿留營撤退李泰國以赫德辦理總稅
務司辛巳粵匪竄龍勝總兵胡元昌死之甲申諭駱秉章分軍剿贛對疏通藏
路諭阻法教士入藏傳教丁亥朝陽餘匪竄擾昌圖詔臣工力求節儉趣賈洪
詔赴昭通以捐備馬匹賞扎薩克台吉明珠爾多爾濟貝子銜戊子李雲麟軍
失利粵匪陷陝西山陽張總愚竄鄧州賴曹諸酋竄鳳縣兩當庚寅左宗棠軍
擊敗杭州餘杭踞賊壬辰藍逆陷盤屋癸巳上釋服逾期祁寯藻倭仁李鴻藻
請黜浮靡以固聖德懿旨屏斥玩好遊觀興作諸務祁寯藻等其各朝夕納誨
養成令德以端治本而懋躬行逆酋古隆賢就撫收復石埭太平旌德曾國荃
等軍復秣陵關丙申桂軍復容縣丁酉程學啓等軍攻克濟墅關己亥官軍剿

昌圖匪失機諭責玉明諱飾辛丑英桂遷福州將軍以沈桂芬署山西巡撫癸卯李秀成援蘇州李鶴章等軍擊敗之命富明阿幫辦僧格林沁軍務是月免廣西永安等州廳縣被擾新舊額賦十一月丙午奉天匪竄吉林玉明等會剿皖軍復懷遠及蚌埠丁未僧格林沁督諸軍攻剿苗沛霖誅之李鴻章督軍復蘇州粵會郜雲官等降加鴻章太子少保銜程學啟世職並賞黃馬褂戊申逆曾楊友清等以高淳寧國建平溧水降李雲麟等復山陽粵軍復信宜己酉劉典等軍復昌化庚戌藍逆竄商南癸丑張總愚竄浙川甲寅僧格林沁軍復下蔡壽州丙辰李鴻章誅郜雲官等遣散降衆丁巳李鶴章軍克無錫金匱庚申李續宜卒邱縣匪張本功等糾衆抗糧捕誅之實授閩敬銘山東巡撫汧陽回衆降壬戌官軍復穎上正陽癸亥馬化龍陷甯夏靈州論平苗逆功復李世忠職會國荃軍克淳化等隘進駐孝陵丙寅官軍克嘉善張涇漚丁卯逆回圍甯夏滿城庚午蘇軍復平湖賊目以乍浦嘉善降是月免山東泗水等州縣災援錢糧直隸武清等州縣被災額賦賑吉林打牲烏拉災十二月丁丑提督江忠

義卒於江西軍次庚辰蘇軍克平望辛巳唐訓方能以喬松年爲安徽巡撫戊子以唐友耕爲雲南提督令赴昭通辛卯譚廷襄言統籌黃河下游地勢請濬支渠以減漲水培土埵以衛民田諭劉長佑閻敬銘會同籌辦癸巳陝回粵匪紛竄甘境甲午允蘇松太漕糧減價折徵乙未上御撫辰殿大幄賜蒙古王公宴賞賚有差每歲皆如之復彰化臺灣兩路賊平丙申翁同書加恩遣戍命左宗棠別除浙東地丁積弊飭陝鄂川會勦漢南逆匪是月免山東陝西被擾州縣新舊額賦並孝義等廳縣倉糧是歲朝鮮入貢

三年甲子春正月癸卯朔上率王大臣慶賀兩宮皇太后禮成御太和殿受朝自是每歲皆如之甲辰李鴻章軍擊常州援賊於奔牛鎮大捷丙午鳳翔回民乞撫許之商南匪竄鄆西調湖北石清吉軍赴陝援陝川軍失利於青石關庚戌河南捻匪竄隨州癸丑豫軍勦張總愚於趙莊山口失利己未官軍復修文及册亨庚申調直晉兵援甯夏諭阿拉善旗禁蒙民與回匪勾結甲子李世賢竄積溪內寅命都興阿赴綏遠會辦防務富明阿赴揚州接辦軍務己巳浙軍

復海甯彰化匪首戴萬生伏誅粵匪竄石泉漢陰甯陝是月免安州等處歉收
通賦二月壬申朔官軍復漢中留壩黔軍復龍里乙亥粵匪竄廣信建昌庚辰
甯夏回匪犯中衛等處熙麟分兵援之壬午廣東三山土匪平癸未粵匪陷鎮
安旋復之丁亥多隆阿圍整屋久未下切責之停山東敵捐從閩敬銘請也戊
子桂軍克蒼梧等縣庚寅曾國荃等軍克鍾山石壘合圍金陵蔣益澧軍復桐
鄉粵匪偏圍境張運蘭軍援之壬辰豫軍克息縣光州賊寨甲午粵匪竄廣豐
弋陽庚子陝南匪竄內鄉三月壬寅程學啓等軍克嘉興贛軍復金谿江南軍
復溧陽陝軍克整屋多隆阿以傷賜假穆圖善暫督軍務雷正綰等軍進剿逆
回川匪藍二順竄洵陽丙午僧格林沁統全軍赴豫進至許州江南軍復廣德
嘉義匪首林贛晟伏誅己酉戈登攻金壇受創命慰問岑毓英等軍克他郎鎮
沅庚戌命多隆阿督辦陝甘軍務壬子蔣益澧各軍克復杭州及餘杭加左宗
棠太子少保銜賞益澧黃馬褂尋予世職甲寅免杭嘉新復各地錢糧二年命
穆圖善幫辦多隆阿軍務暫署欽差大臣川軍攻松潘匪復壘溪營城丁巳滇

軍復景東元謀及楚雄癸亥贛匪竄福建乙丑逆首藍大順伏誅丙寅浙軍復
武康德清石門諭左宗棠收養杭州難民己巳提督程學啓卒於軍庚午張總
愚竄鎮平甘肅回匪馬三娃陷赤金堡官軍剿平之是月免貴州各府廳州縣
被撥通賦夏四月辛未朔日有食之壬申鮑超軍復句容丙子命都興阿赴定
邊接統訥欽所部各軍進剿甯靈踞匪丁丑李世賢等竄江西鮑超軍復金壇
搶粵各匪合竄棗陽陝南匪竄河南陷荊子關戊寅湘軍會復古州辛巳嚴滅
紹興淨收錢糧著爲永例甲申李鴻章督軍克常州馮子材等軍復丹陽以故
朝鮮王李昇世子嬰襲爵命侍郎阜保副都統文謙往封丙戌以侍郎薛煥通
政使王拯互訐均予降調並申誠臣工官文赴安陸督師嚴樹森辦省城防守
庚寅多隆阿卒於軍命都興阿督辦甘肅軍務雷正綰幫辦之辛卯贛軍解玉
山圍癸巳嚴樹森以官文劾降以吳昌壽爲湖北巡撫唐訓方署之命楊岳斌
督辦江西皖南軍務辛卯僧格林沁會楚軍剿粵捻於隨州大敗之丁酉以江
防下游肅清裁汰師船並弛封江之禁戊戌粵匪陷弋陽陝南粵逆竄德安府

僧格林沁軍追剿之己亥申誠統兵大臣奏報粉飾是月免武進陽湖本年額賦五月庚子朔黔匪陷長寨定番廣順旋復之甲辰粵匪竄天門應城德安隨州乙巳粵匪陷甯化旋復之熙麟病免以楊岳斌爲陝甘總督都興阿署之丁未允日斯巴尼亞立約通商命薛煥崇厚充全權大臣妥爲辦理諭李鴻章撥勁旅助攻金陵己酉李世賢犯撫州官軍擊走之復弋陽賞戈登黃馬褂花翎並提督章服汰留常勝軍撤遣外國兵官辛亥官軍復都江上江等城粵匪竄逼西安癸丑褫劉蓉李雲麟職留任命穆圖善留西安會籌防剿黔匪竄秀山戊午鮑超乞假葬親詔慰留李世賢陷宜黃崇仁南昌戒嚴庚申回匪陷狄道旋復之壬戌粵匪竄黃陂官文移軍孝感癸亥懿旨瑞常寶盛載齡單懋謙徐桐輪直進講治平寶鑑粵匪再陷建甯甯化旋復之丁卯雷正綰軍復平涼戊辰諭疆吏不分畛域會輯邊匪命李恒嵩劉卞膏與丹使璧勅在上海換約己巳桂軍克貴縣賊巢潯州肅清六月壬申申誠各部院大臣毋得仍前泄沓癸酉粵匪竄麻城黃岡丁丑兩蘇軍復長興黔軍復普安馬如龍岑毓英各軍剿

遜西回匪復中甸維西思茅威遠及石膏井等賊巢戍寅庫車漢回亂辦事大臣文藝回子郡王愛默特死之安置哈薩克衆於齋桑淖爾東南戊子贛軍克貴溪賊壘曾國荃軍克金陵外城辛卯雨回匪陷布古爾庫爾勒諭撤納欽等軍癸巳浙軍復孝豐戊戌官軍克復江甯洪秀全先自盡其子福瑱遁獲賊曾洪仁達李秀成江南平遺醇郡王詣文宗几筵代祭告上詣兩宮賀捷論功晉封曾國藩一等侯曾國荃一等伯加太子少保銜提督李臣典一等子賞黃馬褂蕭孚泗一等男均賞雙眼花翎按察使劉連捷等賞世職升叙有差命戮洪秀全屍傳首各省論各路剿賊功封僧格林沁子伯彥訥謨祜爲貝勒官文一等伯李鴻章一等伯駱秉章一等輕車都尉均賞雙眼花翎加楊岳斌彭玉燾太子少保並鮑超均一等輕車都尉都興阿富明阿馮子材騎都尉魁玉雲騎尉回逆陷喀喇沙爾辦事大臣依奇哩等均死之是月免福建建甯等縣屬被擾通賦秋七月庚子以江南平論功晉封議政王恭親王子載澂貝勒載溶不入八分輔國公載溎不入八分鎮國公加軍機大臣文祥太子太保銜寶鋆李

棠階太子少保銜加恩宗親及御前大臣內務府大臣餘資錄有差辛丑以歲逢甲子詔停旬情實人犯諭江南新復民生彫敝有司招徠撫恤之其軍務未靖請省統兵大臣督撫等須激厲將士奮勉圖効俄兵入科布多卡倫執委員及扎薩克王寅禁宗室覺羅潛住外城甲辰追諭附苗沛霖罪總兵博崇武等成新疆按察使張學醇戍軍臺粵匪竄踞羅田桂匪陷歸順己酉詔修明太祖陵裁江北釐金復兩淮鹺務庚戌實授沈桂芬山西巡撫以鄭敦謹爲河東河道總督辛亥丹國換約成壬子洪仁達李秀成伏誅汪海洋竄踞許灣癸丑洪福瑱入湖州鹽茶固原回匪復叛北竄甯靈擾中衛靖遠撤回旬結陷循化廳吐魯番屬托克遜漢回亦變亂甲寅戶部侍郎吳廷棟言金陵告捷請益加敬懼嘉納之丁巳以廣西道梗止越南入貢奇台漢回作亂古城烏魯木齊同時不靖文永等軍進援庫車失利覆於烏沙塔克拉死之庚申狄河回匪結撤回擾河州贛軍復崇仁東鄉辛酉復金谿壬戌祁寯藻因病乞休命仍以大學士銜直弘德殿官軍獲昌圖盜匪劉發好等誅之癸亥復鄭親王怡親王襲爵錄

己故諸臣功予胡林翼一等輕車都尉李續賓二等輕車都尉塔齊布張國樑
江忠源程學啓三等輕車都尉加賞江忠濟羅澤南多隆阿曾國華一雲騎尉
贛軍復宜黃甲子克許灣乙丑僧格林沁敗賊麻城曾國荃乞病溫諭止之李
臣典以傷卒於軍是月免江蘇安徽各屬被擾通賦八月己巳朔定諸王位次
著爲令贛軍復南豐庚午烏魯木齊參將反提督業普冲額死之伊犁危急調
塔爾巴哈台喀爾喀蒙兵接之諭劉蓉專辦陝西軍務穆圖布統所部赴甘與
雷正綰籌辦軍務趣楊岳斌卽赴陝甘任辛未諭張集馨赴固原鹽茶辦撫回
事宜癸酉蘇浙官軍會克湖州及安吉乙亥贛軍復新城陳炳文降辛巳官軍
復廣德賞郭松林世職楊鼎勳周盛波黃馬褂貴縣匪平擢劉銘傳爲直隸提
督壬午回匪陷古城漢城癸未雷正綰軍克張家川賊巢甲申僧格林沁剿羅
山竄賊失利都統舒通額等死之丁亥雲南巡撫賈洪詔以藉病規避褫職己
丑調土謝圖汗車臣汗蒙兵赴烏魯木齊等處助剿壬辰浙軍追賊於昌化淳
安擒賊酋黃文金等誅之以林鴻年爲雲南巡撫癸巳詔新疆各路大臣分別

剿撫以回郡王伯錫爾聯絡各城殺賊嘉獎之庫爾喀喇烏蘇等處回匪亂官軍失利甲午命麟興辦烏里雅蘇臺立界事宜乙未僧格林沁剿賊失利總兵巴揚阿等死之丙申雷正綰攻蓮花城不利回匪復陷固原丁酉河狄回匪竄犯蘭州及金縣九月己亥朔劉銘傳各軍擊敗甯國等處竄匪庚子贛軍復等都以李雲麟乞病規避褫職撤所統隨軍壬寅曾國荃以疾乞免尤之命馬新貽爲浙江巡撫留辦安慶防守事宜癸卯命穆圖善幫辦都興阿軍務甲辰楊岳斌乞病溫諭止之李世賢犯南安官軍擊走之乙巳回匪陷葉爾羌署參贊奎棟死之喀什噶爾英吉沙爾武弁同叛己酉西甯回衆降庚戌張家川回匪犯慶陽辛亥贖賊竄南雄壬子粵匪陷開化竄江西黃麻匪竄商城乙卯日斯巴尼亞換約丙辰諭內務府力求撙節命札克通阿署哈密大臣丁巳西甯回匪復叛戊午粵匪蔡得榮等竄陷階州庚申詔修曲阜聖廟及各省學宮辛酉修浙江海塘甲子擒匪竄薪水鄂軍失利總兵石清吉死之乙丑俄兵闖入阿爾泰淖爾丁卯沈桂芬請籌費移屯以恤旗民冬十月戊辰朔允楊岳斌回籍

省親並募勇赴甘命刑部尙書綿森戶部侍郎吳廷棟往治察哈爾獄己巳改
烏魯木齊提督文祥名爲文祺辛未禡將軍常清職命明緒代之以聯捷爲參
贊大臣命武隆阿統援救烏魯木齊各軍節制領隊大臣以下壬申鮑超軍擊
賊大捷賞雙眼花翎席寶田軍獲賊酋洪仁玗等皖南北肅清乙亥回匪陷烏
魯木齊滿城及綏來都統平瑞等死之哈密漢回亂命保恆署烏魯木齊都統
李鴻章署兩江總督吳棠署江蘇巡撫富明阿署漕運總督戊寅獲洪福瑱於
石城誅之賞沈葆楨一等輕車都尉封鮑超一等子論恢復全浙功封左宗棠
一等伯賞蔣益澧騎都尉粵匪陷瑞金旋復之庚辰粵匪陷漳州龍巖南靖武
平按察使張運蘭等死之劉蓉分軍守邠州等處乙酉明誼與俄使換分界約
科布多城卡外蒙古阿爾泰淖爾烏梁海均屬俄給鮑超假所部宋國永等軍
援閩歸左宗棠節制丁亥雷正綰軍克蓮花城賞曹克忠黃馬褂僧格林沁剿
賊大捷賞郭寶昌等黃馬褂賊首馬融和以衆降己丑四川援軍復仁懷庚寅
粵匪陷平和辛卯陷嘉應大埔丙寅諭曾國藩仍駐金陵李鴻章等回本任是

月免河南信陽等處被擾額賦浙江西安等縣通賦十一月己亥豁江甯所屬糧賦三年壬寅回匪陷河州癸卯築濮州金隄乙巳文祺伯錫爾剿平哈密回已酉免江蘇歷年州縣攤賠銀兩永禁派攤名目壬子沈葆楨請飭援閩兼防賊回竄甲寅粵軍復武平命閩浙贛軍會剿毋縱入海回匪陷阿克蘇烏什辦事大臣富珠哩文興等死之癸亥僧格林沁擊襄棗竄匪不利髮捻各匪遂竄鄧州甲子諭飭劉連捷劉銘傳各軍前進歸僧格林沁調遣乙丑雷正綰等軍剿敗固原回匪丙寅文祺等剿巴里坤回匪平之回匪陷庫爾喀喇烏蘇伊犁戒嚴丁卯滿慶言汪曲結慶卒請賞青饒汪曲諾們罕名號協理西藏商上事務允之是月免江蘇上元等縣被擾通賦十二月戊辰朔閩軍剿漳州匪失利林文察等死之己巳命吳棠仍兼管江北事務庚午肇慶客匪平都興阿等軍克清水堡甲戌停河南例貢聚實修浙江海塘乙亥回匪陷金縣曹克忠軍克鹽關戊寅伊犁官軍敗績領隊大臣托克托奈等死之允明緒請借俄兵助剿己卯濟木薩官軍失利庚辰予諸賢義民包立身等優卹允吳棠請試行河運

乙酉陶茂林軍復金縣丙戌李元度軍臺已丑僧格林沁移軍寶豐剿賊勝
之甲午官軍剿回匪大捷伊犁解圍賞明緒黃馬褂是月免浙江瑞安被擾逋
賦江蘇太倉等州廳縣淮安等衛被擾災賦是歲朝鮮琉球入貢

四年乙丑春正月丁酉朔官軍克靜甯賊巢回匪陷古城漢城庚子巴彥岱城
被圍官軍不利釋陳孚恩樂斌命襄辦伊犁兵饑事壬寅從曾國藩請調劉銘
傳軍赴閩鮑超募川軍赴甘追予死事道員何桂楨知州劉騰鴻游擊畢金科
甲辰烏魯木齊提督文祺卒于巴里坤回匪陷木壘等處丁未張集馨以罪褫
職復已革提督馬德昭原官平固回匪竄擾靈臺及汧陽隴州戊申命伯錫爾
署哈密幫辦大臣辛亥臺灣會匪平甲寅粵匪陷永定雲霄丙辰復設淮陽河
務兵備道改設徐海河務兵備道丁巳粵捻並竄魯山護軍統領恆齡等死之
癸亥回匪陷濟木薩甲子黔匪陷定番旋復之又陷黔西乙丑回匪竄永昌二
月辛未以蒙兵援古城戰不利諭撤已調各兵均回旗壬申陝軍敗回匪於醴
泉命胡中和總統進剿戊寅以雲南臨安官紳不附回逆諭嘉之己卯允沈葆

柏假歸省癸未以直隸諸省雷雹災異詔修省雷正綰軍復克固原等處貴州參將曹元興謀逆伏誅甲申長陽土匪平丙戌復永定龍巖武隆額等軍援巴彥岱城失利己丑黔西匪陷大定苗匪陷天柱古州以馬如龍岑毓英肅清曲靖尋甸擒斬逆首馬聯陞等獎叙有差癸巳福建官軍勦李世賢汪海洋各股於古田漳州大捷三月丁酉以田興恕玩視軍務慘殺教民遣戍新疆辛丑陶茂林剿平郭家驛等處回匪諭僧格林沁駐軍指揮調度勿輕臨前敵致蹈危機壬寅恭親王罷直軍機議政命文祥等辦總理各國事務衙門事宜粵匪陷韶安知縣趙人成死之癸卯涼州回衆叛剿平之尤英法在江甯通商命鮑超籌備西征專奏悼親王言恭親王被參不實下王公大學士等詳議以聞乙巳塔城回亂錫霖乞病罷之命赴伊犁由明緒調遣提督譚勝達以剋扣勇糧褫職仍命赴鮑超軍以武隆額署塔爾巴哈台參贊大臣丁未巴里坤領隊大臣色普詩新以兵援古城遇賊失利死之己酉閩軍敗汀州連城踞賊庚戌甘軍擊退古浪平番回匪辛亥從王大臣請命恭親王仍在內廷行走並管總

理各國事務衙門內辰諭官文簡汰兵勇己未命楊岳斌赴甘沈葆楨丁母憂
詔奪情署江西巡撫辛酉西甯回匪復叛陷大通壬戌桂軍復永淳癸亥命毛
昶熙回京是春免直蘇皖贛災擾諸處額賦及通課夏四月乙丑朔禁熱河圍
場墾紅椿內地肅州回匪踞嘉峪關圍州城撫彝回匪亦起丁卯彭玉麟疏辭
漕督請專辦水師允之留吳棠漕運總督任辦清淮防務己巳官軍復鹽茶廳
免己革提督成瑞罪庚午回匪陷古城領隊大臣惠慶等死之乙亥臺灣肅清
丁丑黔軍復玉屏天柱命恭親王仍直軍機母復議政甘州回匪陷永固堡壬
午粵匪再陷沈宿寔軍十八營不願西征潰於金口止鮑超西征命招集潰勇
赴閩剿賊乙酉甯夏官軍剿賊大捷丙戌粵捻並回竄克濟命劉銘傳赴直隸
設防己丑賜崇綺等二百六十五人進士及第出身有差壬辰以山東賊勢蔓
延命曾國藩出省督師會僧格林沁軍南北合擊癸巳僧格林沁剿賊於荷澤
南吳家店失利及內閣學士全順總兵何建勳等均死之事聞輟朝三日特予
配饗太廟命曾國藩督師剿賊李鴻章署兩江總督五月乙未朔諭成祿進剿

肅州踞匪寔營叛勇由江西竄福建粵捻並竄開州東明丙申陶茂林軍潰回匪圍安定蘭州戒嚴戊戌命曾國藩節制直豫魯三省軍防甘肅潰勇竄擾陝西乙巳免李元度遣戍丁未粵捻並渡運河東竄濟甯兗泰戊申嚴諭盛京吉林剿辦馬賊己酉以剿賊無功褫官文張之萬毛昶熙職均留任並撤官文官銜趣鮑超赴江西辛亥命侍讀學士衛榮光赴東昌督辦沿河民團壬子官軍克漳州南靖尤沈葆楨終制曾國藩辭節制三省軍務不許回匪陷肅州粵捻分竄豐沛諭整頓沿海水師竄陝潰勇平諭劉長佑駐直境崇厚駐東昌部署沿河防務黔匪陷廣順旋復之甲寅兩粵匪圍永定乙卯蘇軍復漳浦以劉坤一爲江西巡撫庚申以防剿遲延褫提督劉銘傳職仍留任楊岳斌請開缺不允仍命赴甘壬戌奇台官軍復濟木薩癸亥官軍復階州閏五月甲子朔起沈葆楨督辦江西防剿乙丑粵匪由福建竄嘉應戊辰粵軍復平和詔安川軍復正安壬申泗城匪平甲戌滅杭嘉湖屬漕米二十六萬石丁丑汪海洋回竄永定官軍失利總兵丁長勝等死之己卯回匪踞阜康張總愚南竄至雉河集諭

劉銘傳吳棠等會剿粵匪陷廣東鎮平遊義匪降丙戌鄂爾多斯蒙兵擊退花馬池回匪黔匪陷綏陽己丑上臨僧忠親王喪賜奠賞其孫那爾蘇貝勒溫蘇都輔國公竹國藩駐軍臨淮特克慎卒命阜保查巴爾虎爭界事恩合爲吉林將軍庚寅以久旱諭修省求言癸巳諭耆英獲咎毋庸昭雪禁肅順之子出仕以耆英子慶錫鳴冤謂其死由肅順也六月甲午朔增設安徽安徽和道改鳳廬穎道爲鳳穎六泗道仍兼鳳陽關監督命劉長佑回保定潘鼎新軍駐濟甯丙申甘肅民勇復嘉峪關以安西玉門諸縣回亂諭楊岳斌進駐蘭州己亥申諭各省甄別牧令壬寅塔爾巴哈台回匪誘戕參贊錫霖等圍城爲喇嘛棍噶札拉參兵擊退調武隆額爲塔爾巴哈台參贊大臣以額騰額爲葉爾羌參贊大臣丙午兩諭載華等辦工侵蝕罪奪載華貝子恩錫輔國公仍圈禁二年己酉沈桂芬以憂免命曾國荃爲山西巡撫黔匪復陷天柱擾湖南會同勞崇光李瀚章合剿之黔軍復黔西在獨山失利壬子岷州回匪亂戕知州增啟等擾洮州乙卯援黔川軍復正安丁巳奇台哈密陷哈密辦事大臣札克當阿死

之文麟退巴里坤諭楊岳斌成祿聯捷軍進擊肅州匪回子台吉陸布沁投誠
丁巳御史穆緝香阿請慎選侍御僕從諭內務府稽察有便僻側媚者舉實嚴
懲是夏免陝西浙江福建等州縣被擾額賦及哈密兵糧課秋七月癸亥朔
諭劉蓉嚴防定邊鄜延邠隴楊岳斌防範回酋赫明堂甲子回匪陷巴燕岱伊
犂領隊大臣穆克登額等死之視助逆伯克都魯素等職官軍復庫爾喀喇烏
蘇命布爾和德署領隊大臣援塔城雷正綰各軍攻金積堡失利退至鞏州丁
卯武隆額剿禮拜寺回逆平之黔匪陷石阡知府嚴謹陣沒官軍旋復其城癸
酉命董恂崇厚爲全權大臣辦理商約事務己卯賞科爾沁親王伯彥那謨祜
世襲博多勒噶台親王號壬午御史蔡壽祺以妄言褫職黔匪陷大定旋復之
己丑奉天馬賊擾遼化薊州罷玉明予嚴議以恩合署盛京將軍換荷蘭約庚
寅諭禁法教士干預軍事壬辰陳國瑞罷幫辦軍務八月庚子以議撫貽誤褫
恩麟職成成瑞黑龍江祁寯藻致仕粵捻各逆竄皖豫境壬寅設機器局于上
海癸卯回匪犯巴里坤訥爾濟擊走之文麟軍于奎蘇失利甲辰裏塘夷務竣

予四川總督駱秉章假命崇厚署之嚴諭麟興親勘唐努烏梁海立界乙巳命左宗棠駐粵節制贛粵閩三省各軍丙午命曾國藩進駐許州會剿豫捻辛亥令伊犁捕誅從逆官兵予剿賊出力額魯特總管蒙庫巴雅爾等獎叙有差癸酉褫玉明職郭嵩燾請開缺以語多負氣嚴飭之減江西丁漕浮收裁州縣捐攤繁費粵曾汪海洋殺李世賢乙卯粵匪陷廣東長樂英法還天津海口礮臺丙辰都興阿辭督辦軍務不許丁巳諭李鴻章等妥議江北新漕河海並運庚申蘇松杭嘉湖屬水賑恤之予龍溪鄉團殉難男婦建祠賜名忠義鄉辛酉諭崇實等查辦酉陽教案九月甲子上躬送定陵奉安命肅親王華豐等留京辦事長樂賊以城降粵軍丙寅免定陵奉安經過地方田賦戊辰以捻首張總愚及賴任各逆竄擾豫魯命李鴻章會剿吳棠署兩江總督李宗羲署漕運總督命曾國藩仍駐徐州己巳允招商辦雲南銅廠庚午調江南礮船赴山西河防教習水戰壬申好水川回衆降官軍解南陽圍陶茂林軍再潰甲戌官軍復鎮平丙子雷軍部將胡大貴雷恆叛圍涇州提督周顯承擊退之馬化龍與胡大

貴等分竄陝境授張之萬河東河道總督己卯上奉兩宮皇太后啓鑾粵匪犯龍南劉坤一赴贛州督剿甲申恭文宗於定陵乙酉回鑾奇台知縣恆顛以民勇復奇台濟木薩古城三城丁亥上還宮戊子文宗帝后升祔太廟翼日頒詔覃恩有差庚寅褫甘肅提督陶茂林職以曹克忠代之逮治總兵陶生林等左宗棠辭節制三省不允是秋免陝西孝義浙江蘭谿等處被擾通賦冬十月壬辰朔藏兵克瞻對回匪犯慶陽官軍擊退之癸巳定比利時條約甲午命徐繼畬以三品京堂在總理各國事務衙門行走命廓爾喀例貢俟六年並進庚子減浙江漕米南米浮收壬寅粵匪陷和平乙巳王榕吉言潞鹽壅滯請分別停減續加課票議行丁未回匪圍鞏昌甯遠己酉浙軍克南田賊壘辛亥命劉蓉署陝西巡撫壬子以升祔禮成哈祭太廟醇親王辭八旗練兵諭仍稽察校閱勤加訓練甲寅馬賊偪奉天官軍失利庚申命福興統吉黑馬隊及神機營兵赴剿辛酉釋綿性十一月癸亥賴任各匪竄舞陽鄆城與張總愚股合諭鄂豫夾擊丙寅滅征蘇松常鎮太倉米豆五十四萬石有奇壬寅奉軍剿馬賊失利

李棠階卒命李鴻藻在軍機大臣上學習行走湖北巡撫鄭敦謹入爲戶部侍郎以李鶴年代乙亥治不顧主將罪成保論斬戍郭寶昌新疆丙子奉天匪首徐點復叛于廣甯庚辰粵匪陷嘉應章昌解圍丙戌官軍失利于濟木薩恆願死之丁亥諭劉長佑駐邊隘督剿馬賊己丑川軍剿松潘番賊平之黔匪犯叙永綦江庚寅命左宗棠親往嘉應視師十二月壬辰朔曾國藩移軍周家口允明緒遺策全如俄借兵貸糧甲午黔匪陷清鎮軍旋復之命周達武爲貴州提督乙未聯捷坐貪擾撤辦軍務以待衛隸成祿軍己亥黎獻軍潰於肅州辛丑馬賊回竄昌圖允戶部請撥鹽課諸款增內廷用費三十萬壬寅熱河軍復朝陽癸卯命伯彥訥謨帖回旗會各盟長檄蒙兵協剿馬賊以文麟爲哈密辦事大臣乙巳瞻對逆酋上布朗結等伏誅三瞻均歸達賴管理丙午金州匪僞降竄鐵嶺命文祥等辦奉天防守事宜壬子以雪澤愆期詔清理庶獄瘞暴露骸骨乙卯恩合以貽誤軍事褫職提督成大吉軍潰於麻城丙辰粵軍會復越南甯海府城調都興阿爲盛京將軍命穆圖善督辦甘肅軍務接都統興阿所

部各軍庚申上御保和殿賜朝正外藩等宴自是每歲皆如之滇軍復隴江鶴慶是冬免四川松潘湖南茶陵等廳州縣被擾通賦

五年丙寅春正月辛酉朔停筵宴甲子擒匪擾鄂曾國藩檄劉銘傳援黃州馬化龍乞撫獻甯夏漢城乙丑桂軍復那檀免福建例貢己巳命穆圖善辦撫回善後事宜庚午雲南巡撫林鴻年赴昭通乙亥馬賊入踞伯都訥旋及雙城堡吉林危急文祥寶善檄黑龍江兵暨馬隊援之己卯黃巖總兵剛安泰巡洋遇艇匪死之癸未林鴻年坐畏葸貽誤褫職劉嶽昭代之左宗棠督諸軍復嘉應粵匪平左宗棠以次論功賞叙丙戌馬賊竄陷阿勒楚喀及拉林城富明阿往吉林剿之命特普欽回黑龍江布防守吳昌壽降調李鶴年爲河南巡撫曾國荃爲湖北巡撫戊子奉軍復八面城己丑諭嚴緝軍營哥老會匪二月辛卯朔詔左宗棠等緩撤江閩各軍備調北路助剿捻回諸匪黔回陷永甯旋復之壬辰命兆琛赴鎮遠辦軍務辛丑官軍復黃陂丁未都興阿坐部勇肆殺褫職留任戊申命廣東陸路提督高連陞赴任剿辦土匪伯彥訥謨粘刺馬賊于鄭家

屯大捷諭馬新貽籌辦海塘辛亥定安軍剿馬賊于長春勝之詔復副都統壬子德英憂免以富明阿爲吉林將軍丙辰召郭嵩燾來京以蔣益澧署廣東巡撫己未湖南軍擊退黔苗三月壬戌曾國藩移軍濟甯督剿張總愚乙丑復阿勒楚喀伯都訥雙城堡三城己巳奉軍剿南北路馬賊大敗之獨奉天吉林被擾諸地銀米庚午明誼乞病命麟興統蒙兵援伊犁乙亥賴文光等竄偏開封戊寅免隨証黑龍江牲丁貢貂諭內外臣工講求律例己卯馬賊竄擾熱河庚辰允馬化龍等投誠甲申張總愚竄濮范賴文光等由豫竄鄆城鉅野諭曾國藩等守運河喬松年軍被剿乙酉馬賊陷牛莊丙戌曹毓瑛卒丁亥閩軍復崇安建陽戊子命李鴻藻爲軍機大臣胡家玉在軍機學習是春免河南積欠錢糧直隸安州奉天新民等州縣被水被擾額賦夏四月己丑朔奉天北路匪首馬傻子伏誅降其餘衆官軍復牛莊粵捻犯直隸河岸擊退之辛卯允曾國荃請裁兵併餉並調劉聯捷彭毓橘米南桂郭松林赴湖北丙申回目以洮州降曹克忠軍戊戌命馬如龍署雲南提督庚子召文祥福興回京命都興阿接辦

奉天軍務節制各軍辛丑訥爾濟復木壘奇台古城招募民勇防守癸卯官軍復綏陽甲辰回匪陷靖遠戊申諭奉天吉林會剿山內外賊匪己酉譚玉龍軍潰命曹克忠兼統其軍壬子回匪回竄慶陽披楞大舉悉兵衆迫布魯克巴命景敘赴邊隘查辦甲寅武緣匪平丙辰粵捻擾銅沛及泗州靈壁勞崇光進駐昆明杜文秀復陷麗江鶴慶劍川戊午回匪犯蘭州官軍擊退之五月壬戌黔匪復陷興義貞豐永甯俄使堅請黑龍江內地通商諭特普欽整頓營伍乙丑大考翰詹擢孫毓汶四人一等餘升黜有差戊辰馬朝清降靈州復辛未回匪霍三等回竄鳳岐官軍擊退之諭楊岳斌劉蓉合擊毋再任入陝甲戌回匪陷塔爾巴哈台武隆額死之以德興阿爲參贊大臣奎昌署科布多參贊嚴諭成祿迅速出關乙亥回匪陷伊犁明緒等死之以榮全署伊犁將軍命庫克吉泰督辦新疆軍務丁丑詔清庶獄壬午以久不雨詔求直言禁凌虐罪囚甲申諭保舉盡心民事官吏丁亥官軍復荔波是月免廣東嘉應等處被擄逋賦六月庚寅兩允左宗棠請在閩建廠試造輪船壬辰諭內外大臣勳職辛丑成祿軍

進圍肅州壬寅諭富明阿搜捕山場餘匪甲辰靈山匪平戊申烏里雅蘇臺將軍明誼病免己酉以德勒克多爾濟爲烏里雅蘇臺將軍福興爲綏遠將軍庚戌鹽固回匪投誠辛亥凌雲陽萬土匪平乙卯諭楊岳斌剿狄河回匪秋七月庚申褫廣鳳圖爾庫職逮訊命侍郎魁齡等使朝鮮册封王妃壬戌官軍復哈密甲子諭整頓廣東吏治軍務釐稅乙丑李鴻藻丁母憂懿旨令百日後仍直弘德殿軍機處庚午湘軍克思南賊巢壬申李鴻藻請終制不許癸酉減蘇松常太浮收米三十七萬餘石浮收錢百六十七萬餘貫丙子崇厚會日斯巴尼亞使換約己卯黔匪陷石阡旋復之庚辰免烏梁海七旗應納牛貢乙酉河南河決胡家屯八月戊子劉蓉病免調喬松年爲陝西巡撫以英翰爲安徽巡撫己丑濮州河決庚寅潯鬱匪平裁山海關監督改設奉錦山海道辛丑賞李雲麟頭等侍衛幫辦新疆軍務癸卯楊岳斌病免調左宗棠爲陝甘總督吳棠爲閩浙總督張之萬爲漕運總督實授瑞麟兩廣總督甲辰官軍克大孤山賊巢徐宗禮伏誅乙巳官軍剿敗張牛諸捻以月食示儆飭廷臣修省丁未從御史

慶福請積粟張家口綏遠城轉運新疆以濟民食九月丁巳朔命譚廷襄會崇厚辦義國商約事務癸亥福建興化土匪平甲子諭李雲麟與麟興等整頓北路防軍命阜保赴歸化督運新疆餉款回匪陷阜康祁寯藻卒辛未滇回陷安甯等州縣癸未左宗棠請將閩浙綠營減兵加餉就餉練兵允之是秋免貴州廣東山東福建被擾江西被災等處額賦浙江等縣逋賦冬十月辛卯命劉長佑嚴嚴畿輔兵額癸巳張總愚由陝州竄平陸官軍擊退之乙未命沈葆楨總司福建船政事務命劉典幫辦左宗棠軍務己亥張總愚西竄陷華陰渭南甘回竄宜君三水詔責曾國藩任賊蔓延辛丑允李鴻藻病假命富明阿辦吉林善後事宜汪元方爲軍機大臣壬寅黔回陷興義旋復之並復安平鎮甯乙巳曾國藩乞病請開各缺在營效力並注銷侯爵諭慰之命病痊陞見諭穆圖善援應陝西丙午修海甯石塘是月免安徽壽州等州縣被水新舊額賦十一月丙辰命曾國藩回兩江總督署通商大臣授李鴻章欽差大臣節制湘淮各軍專任勦匪戊午予山東巡撫閻敬銘假以丁寶楨署之庚申劉銘傳等剿任額

各匪於金鄉大捷乙酉三札兩盟西征蒙兵潰李雲麟回烏城諭庫克吉泰統
吉黑軍速進丁卯川軍克桐梓賊巢丁酉曾國荃劾官文貪庸驕蹇命撤任查
辦已卯定福建船政章程十二丁亥以給事中尋鑾焯參劾失實切責之因諭
科道慎重言事己丑郭松林等大破任賴諸匪於德安庚寅以黃河趨北諭蘇
廷魁周歷履勘並會同直魯豫三省籌辦堤工甘回復陷哈密罷胡家玉軍機
擬職留任以受官文賄也甲午曾國藩復疏請開缺溫旨慰留己亥雷正綰軍
復平涼呼蘭匪平庚子援黔湘軍勦苗匪於銅仁大捷己酉回匪團慶陽提督
周顯承等力戰死之甲寅陝軍勦張總愚失利於瀾橋總兵肅德陽等死之以
捻勢披猖命曾國藩等廣籌方略是歲朝鮮琉球入貢